

NO LUUKA YOTTINIRI LINJIILA ON NON

Hunorde

1 ¹Bay woodiino yimbe duudube, nangannoobe wallifagol fillayeeji fii piiji feyyunoodi hakkunde men, ²wano bee tawanoobe gila ka fuddoode yottinirnoo non e men, ben seeditorbe gite mun, wonti kurkantooбе daaluyee on, ³min kadi mi taw no hawranimmi, yo Tawaafiilu teddudo, tippude e koo ko mi tefi, mi fensiti gila ka fuddoode, weebitirangol on dun bindudi rewrundi, ⁴fii no andiron pellital wongal ngal e nder dii janndeiji di jannadon.

Fii Fejjinannde Jibineede Yaaya

⁵ Fewndo *Heroodu laaminoo diiwal *Yahuuda ngal, wooduno *yottinoowo sadaka wi'eteedo Zakariyaa'u jeyaado e mojobere oo wi'eteedo Abiiya. Sonna makko ko e lenol *Haaruuna jeyaa, on no wi'ee Elisabaatu. ⁶Be didoo non ko be feewube yeeso Alla, awa kadi hibe jokkunoo yamirooje e sariyaaji Joomiraado on e baawo feloore. ⁷Kono tawi be maraa biddo, bay hari Elisabaatu wonaa jiidotoodo, awa kadi mo kala e mabbe nawyii.

⁸ Tawi non e nder ko kanko Zakariyaa'u o gollaynoo golle yottingol sadakaaji ka Alla, dun ko fewndo ko mojobere makko nden ardinaa yottingol sadakaaji, ⁹o toddorano urba tippude e naamuaji mabbe kambe yottinoobe sadaka ben naatugol ka nder juulirde Joomiraado on, fii ittugol sadaka urngallooji sunneteedi. ¹⁰Fewndo on saa'i ittugol sadaka urngallooji, tawi jamaa on fow no juula ka yaasi.

¹¹ Ko fewndo on saa'i malaa'ikaajo Joomiraado on feejnani mo, no darii ka jaamo ittirde sadaka urngallooji. ¹²Bay Zakariyaa'u yi'ii on malaa'ikaajo, o denyi, o huli. ¹³Kono malaa'ikaajo on wi'i mo: «Wota a hulu, yo Zakariyaa'u, ko fii toraare maa nden jabaama. Sonna maa Elisabaatu jibinante boobo gorko, a innay on Yaaya.

¹⁴ O wonane welo-welo e weltaare, awa kadi yimbe buy weltoray jibinegol makko,

¹⁵ sabu o wonay aaden mawdo yeeso Joomiraado on. O yaroytaa njaram mandilinaydan e kala ko caakinta. *Ruuhu Seniido on wonoyay e makko gila ka teege yumma makko, ¹⁶ awa kadi o artiroyay *Banii-Isra'iilayankeebe buy e laawol Joomiraado on, on Alla mabbe. ¹⁷ O yaaray yeeso Joomiraado on e nder ruuhu e doole wa Iiliya, fii no o artira berde baabiraabe e telen-ma 6ibbe mun, o artira murtube ben e telen-ma faamu feewube ben, e fii no o ebbirana Joomiraado on jamaa hebulaniido mo.»

¹⁸ Zakariyaa'u wi'i malaa'ikaajo on: «Ko honno dun henirantammi? Ko fii mi nawyii, awa beyngu an kadi wonii nayeejo.»

¹⁹ Malaa'ikaajo on jaabii mo: «Ko min woni Jibriilu, darotoodo takko Allaahu on. Ko mi imminaado fii yewtugol ma, humpite oo kibaaru moyyo. ²⁰ Jooni, a mbobiday, a waawataa wowlude doo e dun laataade, sabu a hoolaaki dii kongudi an laatoytoodi e saa'i happaado on.»

²¹ Tawi non jamaa on no habpii Zakariyaa'u, hibe jibii ko hondun neebini mo ka nder *juulirde mawnde ton. ²² Bay o yaltii, o waawaali be yewtude hay fus. Be ndaari, be tawi o fejnjananaama ka nder juulirde mawnde ton. O woni e ebbirangol be juude, o lutti mbobidude.

²³ Bay nalaade makko yottingol sadakaaji den timmii, o yiltitii ka suudu makko.

²⁴ Bay feyyii e dun, sonna makko Elisabaatu yetti reedu. O suuditii e nder lebbi jowi, himo wi'a:

²⁵ «E hino ko Joomiraado on wadanimmii kon,

o yeeyitike lan jooni,

o ittanii lan kaa hersa

ka mi wondunoo e hakkunde bee yimbe.»

Fii Fejjinannde Jibineede Iisaa

²⁶Ka lewru jeegaburu, Allaahu on nuli oo malaa'ikaajo wi'eteedo Jibriilu e ndee saare Naasirata jeyaande e ngal diiwal Jaliilu ²⁷haa e oo jiwo wi'eteedo Mariyama, mo gorko wi'eteedo Yuusufu jeyaado e bolondaa Daawuuda yami. ²⁸Malaa'ikaajo on naati ka on jiwo, wi'i: «Mi salminii ma, an oo yedaado sulfu. Joomiraado on no wondi e maa.»

²⁹Ngol kongol jibi mo, o mijjii ko hondun e salminaango nii. ³⁰Malaa'ikaajo on wi'i mo: «Wota a hulu yo Mariyama, sabu a hebii sulfu immorde ka Allaahu on.

³¹Awa a yettay reedu, jibinaa booboo gorko, innoyaa mo Iisaa. ³²O wonay mawdo, o noddiree Gedal Jom Bural on. Allaahu Joomiraado on jonnoyay mo jullere laamu maama makko Daawuuda nden. ³³O laamoyo suudu Yaaquuba ndun haa poomaa, awa kadi laamu makko ngun lannataa.»

³⁴Mariyama wi'i malaa'ikaajo on: «E ko honno dun laatorta, bay mi andaali gorko?»

³⁵Malaa'ikaajo on jaabii mo, wi'i: «Ruuuhu Seniido on aray e maa, bawgal Jom Bural on duwirte^adowdi mun ndin. Ko dun si booboo *seniido heboyteedo on noddiroyte *Biddo Alla. ³⁶Jooni non, Elisabaatu oo musiddo maa ko sowiido, o sowike kanko kadi e nder nayeewu makko booboo gorko. On wi'anoodo jiidotaako no e nder lewru jeegaburu mun ³⁷sabu alaa ko Allaahu on ronki.»

³⁸Onsay Mariyama wi'i: «Min ko mi kordo Joomiraado on. Yo woniranana wano wiirudon non.» Onsay malaa'ikaajo on yahi.

Fii no Mariyama Humpitoroyi Elisabaatu

³⁹E nder den balde don, Mariyama immii no hejii yahugol e saare goo ka hoore pelle e nder ndii leydi bolondaa Yahuuda. ⁴⁰O naati ka suudu Zakariyaa'u, o salmini Elisabaatu. ⁴¹No Elisabaatu nanirnood salminaango Mariyama ngon, biddo

^a1.35 Maa: «duhirte».

makko on memminii ka nder reedu makko, kanko Elisabaatu o heewi Ruuhu Seniido on,⁴² o ewnii ko tiidi, o wi'i: «An ko a barkinaado e hakkunde rewbe  en, awa kadi biddo mo saawudaa on ko barkinaado! ⁴³ E ko honno mi newniranaa yo yumma Koohoojo an on seeno ka an. ⁴⁴ No hito salminaango maa ngon naatirnoo ka noppi an, booboo mo mi saawi on memminii weltaare ka reedu an. ⁴⁵ On hooliido ko Joomiraado on fodi dun kon ko laatotoodun, haray ko malaado!»

Beytol Mariyama ngol

⁴⁶ Onsay Mariyama wi'i:

«Wonkii an kin no manta Joomiraado on.

⁴⁷ Ruuhu an on no weltanii Allaahu on,

on Dandoowo lan,

⁴⁸ bay o liiyii giide makko den e ndee lo'ere an

min oo kordo makko.

Ko d un wadi, gila hande kala jamaanu aroyayngu

wi'oyay ko mi barkinaado,

⁴⁹ bay Jom Bawgal on wadanii lan piiji mawnudi,

innde makko nden ko hormorteende.

⁵⁰ Awa kadi yurmeende makko nden no layude

e hoore  en huloobe mo,

gila e jamaanu hebi e jamaanu.

⁵¹ O golliri doole jungo makko ngon golle mawde.

O saakiti  en wadube e berde mun mijooji townitaare.

⁵² O jippini  en marbe doole ka julle mun laamu.

O towni lo'u e  en.

⁵³ O harniri weelaabe  en piiji moyyi.

O radii aldu e  en juude mehe.

⁵⁴ O faabii *Isra'iila'en, 6en jiyaabe makko.

O anditi fii yurmeende makko nden,

⁵⁵ wano o fodirnood maamaabe men 6en

e Ibraahiima e jurriya mun on non haa poomaa.»

⁵⁶ Mariyama wondi don e Elisabaatu e nder lebbi tati. Onsay o yiltitii ka makko.

Fii Jibineede Yaayaa

⁵⁷ Bay hewtii ka Elisabaatu jibinta, o jibini booboo gorko. ⁵⁸ No kawtalbe makko 6en e sibbe makko 6en humpitornoo nden yurmeende nde Joomiraado on yedi mo, 6e weltodi e makko.

⁵⁹ Ka nallal jeetatabal, 6e ari *sunningol booboo on, 6e faalaa mo innitirde ben makko Zakariyaa'u. ⁶⁰ Kono yumma makko yetti haala kan, wi'i: «Oo'o, ko Yaayaa o innatee!»

⁶¹ Be wi'i mo: «Hay gooto e musibbe maa 6en innaaka nden innde don!»

⁶² Be landori ben booboo on ebbirangol mo juude fii andugol ko honno o innata booboo on. ⁶³ Zakariyaa'u torii alluwal, o windi don: «Ko Yaayaa o innatee.» Onsay 6e fow 6e ȳaldi. ⁶⁴ Don kisan, o hetti hunduko makko kon e denngal makko ngal, o wowli, o jarni Alla. ⁶⁵ Onsay yimbe kawtal ngal fow huli, awa kadi kodooli wondi ka hoore pelle Yahuuda din fow hollondiri fii kon ko wadi don. ⁶⁶ Kala nanudo dun miijii e bernde mun, wi'i: «Ko hondun oo booboo laatotoo?» Tawi bawgal Joomiraado on no wondi e makko.

Beytol Zakariyaa'u ngol

⁶⁷ Bay Zakariyaa'u ben booboo on heewii Ruuhu Seniido on, o woni e haalugol ko o longinää, o wi'i:

⁶⁸ «Mantoore wonanii Joomiraado on, on Alla Isra'iila'en,

e nder ko o faabii o sotti jamaa makko on kon.

⁶⁹ O yedii en Dandoowo mawdo

e nder nduu suudu Daawuuda, on jiyaado makko

⁷⁰ wano o daalirnoo e kundule annabaabe makko laabube ben

gila e duubi feyfeyunoodi,

⁷¹ hisingol en e juude aybe men e kala anube en.

⁷² Ko nii o yedirnoo maamiraabe men ben yurmeende,

o anditi *ahadi makko seniindi ndin,

⁷³ dun ko woondoore nde o woondannoo ben men Ibraahiima nden

⁷⁴ fii jattingol en e juude aybe men ben

e newnangol en rewugol mo e baawo kulol

⁷⁵ e nder laabal e peewal yeeso makko,

e nder ngurndan men dan fow.

⁷⁶ An-le oo booboo, a innete annabaajo Alla Jom Bural on,

sabu a hikkanto Joomiraado on yeeso

fii moyfaynangol mo laawi makko din,

⁷⁷ fii no o andinira jamaa makko on wonde

ko yaafuyee junuubaaji mabbe din o yedirta be kisiyee,

⁷⁸ ko fii Alla men on ko heewudo yurmeende,

dun ko nden nde o imminirani en ndaygu immorde ka dow

⁷⁹ fii ndayginangol wonbe ka niwre ben

e ben joodiibe ka dowdi mayde

e fii ardagol en e laawol buttu.»

⁸⁰ Paykun kun njandi, ruuhu makko on kadi tiidi. Ko ka wulaa o daakinoo haa
jnande o feenannoo *Banii-Isra'il'a'en.

Fii Jibineede Iisaa

(Mat. 1.18-25)

2¹E nder den balde don Awgustu lando Roomu on yamiri winditagol laamateeri makko ndin fow. ²Fewndo nden winditannde aranere, hari ko Kiriniiyu woni ko halfinaa ardagol leydi Sirii ndin. ³Mo kala winditorayno ka saare mun.

⁴Yuusufu kajun kadi iwri ka diiwal Jaliilu e ndee saare Naasirata fii yahugol ka diiwal Yahuuda, ka saare Daawuuda wi'eteende Bayti-Lahiimi, bay hari ko o jeyaado e nder beynguure Daawuuda nden, awa kadi ko e ndun suudu o jeyaa, ⁵fii no o winditodira e Mariyama on yamaado makko, tawi on ko sowido. ⁶Fewndo 6e wonnoo don, saa'i ka Mariyama jibinta hewti. ⁷O firtii dikkuru makko ndun. O buumi mo e wudere, o wallini e nder kunnawal jnamminirgal daabeeji, bay hari 6e hebaali werde ka suudu hobbe.

Fii Hakkunde Malaa'ikaabe 6en e Ngaynaakoobe 6en

⁸Tawi e on jemma, no woodunoo e ngal diiwal don ngaynaakoobe daakinoobe fii aynugol gureeli mun din. ⁹Malaa'ikaajo Joomiraado on feenani 6e, annoora Joomiraado on jalbini nokkuure ka 6e woni don. Be huli fota. ¹⁰Kono malaa'ikaajo on wi'i 6e: «Wota on hulu, sabu mido fejjinande on Kibaaru Moyyō mo welo-welo moolanaango wonanayngo jamaa on fow. ¹¹Hande e ndee saare Daawuuda, on dajanaama ton Dandoowo, on-le ko *Almasiihu on, ko kanko woni Joomi on. ¹²Awa seedee mun, on taway boobo penu no buumaa e nder wudere, wallinaa e nder kunnawal.»

¹³No o gaynirnoo wowlude dun, don kisan konu malaa'ikaabe moolanaangu tawti malaa'ikaajo on, no manta Allaahu on, hibe wi'a:

¹⁴ «Mangural wonanii Allaahu on ka kammu,

buttu wonii e oo aduna,

hakkunde ben be o wadani sulfu makko on!»

¹⁵ Bay malaa'ikaabe ben yentii, ngaynaakoobe ben wi'indiri: «Mehen Bayti-Lahiimi ndaaroyen ko wadi ton kon, dun ko koo ko Joomiraado on andini en fii mun!»

¹⁶ Be yahi heja, be tawoyi Mariyama e Yuusufu ton, tawi boobo penu on kadi no wallinaa ka nder kunnawal. ¹⁷ Bay be yi'ii mo, be fillitii ko be wowlananoo kon fii on boobo. ¹⁸ Kala nanunoobe ko ben ngaynaakoobe yewtaynood kon wontiri dun yjalaw. ¹⁹ Mariyama mari dun fow ka bernde mun, maanditii fii miijitagol.

²⁰ Ontuma ngaynaakoobe ben yiltitii, hibe manta mawnina Allaahu on fii kala ko be nanunoo e ko be yi'i wano be wowliranano non tigi.

²¹ Bay balde jeetatiden timmii, o sunninaa o innaa Iisaa, innde nde malaa'ikaajo on toddaninoo boobo on nden ado neene makko saawude mo.

Fii no Iisaa Weebitiraa Yeeso Joomiraado on

²² Bay nalaade fii labbinagol mabbe ngol timmii, wano Sariya Muusaa on wiirunoo non, be nabi boobo on *Yerusalaam fii weebitangol mo Joomiraado on, ²³ (wano windori non ka Sariya Joomiraado on: «Kala boobo gorko afo on ka neene mun ko Joomiraado on jeyi.»),^{b24} e fii ittugol sadaka legetereeji didi maa gabooji kecci didi wano wiiranoo non ka Sariya Joomiraado on.

²⁵ Tawi no woodunoo Yerusalaam gorko wi'eteedo Sim'uunu. On ko feewudo e kadi ko rewoowo Joomiraado on. Himo tijjaninoo *Isra'iila'en on Dandoowo, tawi kadi *Ruuhu Seniido on no e hoore makko. ²⁶ Ruuhu Seniido on fejnjinanno mo wonde o maayataa ado o yi'ude Almasiihu Joomiraado on. ²⁷ Ruuhu Seniido on

^b2.23 Maa:«Kala boobo gorko afo on ka neene mun noddiroyte laabudo Joomiraado on.» Egg. 13.2, 13.12 e Lew. 12.6

ardii mo haa ka *juulirde mawnde. Fewndo ko mawbe paykun kun addata kun, dun ko Iisaa, fii laatinangol kun aadaaji mabbe tippude e Sariya Muusaa on,
²⁸ kanko Sim'uunu o tambii paykun kun ka juude makko, o jarni Alla, o wi'i:

²⁹ «Jooni non, yaa an Joomiraado,
 a accay jiyaado maa on maaya e nder buttu
 wano daalirannodaa mo non,
³⁰ sabu mi yi'irii gite an den kisiyee iwrudo e maa on,
³¹ mo moyyindaa yeeso jamaaji din fow,
³² dun-le ko ndaygu hentinanayngu leyyi aduna on fow
 e darja wonanaydo jamaa maa *Isra'iila on.»

³³ Ben makko e yumma makko ɻaldii fii ko wowlanoo fii makko kon. ³⁴ Sim'uunu du'anii be, wi'i Mariyama neene paykun kun: «Awa kun paykun wonoyay fii libugol wobbe, banta beya e nder leydi Isra'iila ndin e fii wonugol maande nde yimbe ɻen yeddata, ³⁵ e fii no mijooji berde buy feejira. An kadi a hebay nguli bernde wa tufiraande kaafa.»

³⁶ Tawi no woodunoo don kadi debbo haaloowo ko Alla longini dun wi'eteedo Hannatu, on ko gedal Fanu'iila, jeyaado e bolondaa Asiira, duubindo fota. On ko yeru duubi jeedidi wondunoo e moodi mun gila curbayaagal makko. ³⁷ Ontuma o heynii haa o hebi duubi cappande jeetati e nay. E nder dun kadi, o iwataano ka juulirde mawnde, himo duuminoo ton e rewugol Alla, hoora, toroo jemma e nalorma. ³⁸ On debbo hewti e on saa'i tigi, himo jarna Alla, himo wowlana kala tijjinoodo hisineede ndee saare Yerusalem fii kun paykun.

³⁹ Bay Yuusufu e Mariyama wadii ko Sariya Joomiraado on yamiri kon fow, be yiltitii ka saare mabbe Naasirata, dun ko e nder Jaliilu. ⁴⁰ Tawi paykun kun no njandude tun tiida e nder ko kun heewata faamu kon. Awa kadi sulfu Alla on no e hoore makkun.

Fii Iisaa Paykun ka Juulirde Mawnde

⁴¹ Tawi mawbe Iisaa ɓen yahayno hitaande kala Yerusalaam fii *Juldeere Yawtaneede nden^c. ⁴² Bay kun hebii duubi sappoo e didi, ɓe yaadi e makkun e nden juldeere wano woowiri non. ⁴³ Bay juldeere nden feyyii, mawbe paykun kun hooti, kono kajun paykun kun, dun ko Iisaa, lutti Yerusalaam, tawi mawbe makkun ɓen andaali. ⁴⁴ Bay hibe sikka paykun kun no wondi e ɓe ɓe arduuno ɓen, ɓe yahi yero nallal. Onsay ɓe woni e dabbitugol kun e hakkunde sibbe mabbe ɓen e andindiraabe mabbe ɓen. ⁴⁵ Bay ɓe yiitaali kun, ɓe yiltitii Yerusalaam fii dabbitoygol kun. ⁴⁶ Balde tati baawo dun, ɓe tawoyi kun ka juulirde mawnde, hikun joodii hakkunde karamokoobe ɓen, hediti ɓe, e kadi hikun landotonoo ɓe lande. ⁴⁷ Nanunoobe hikun yewta ɓen fow ȝaldi sabu hakkille makkun den e ko kun jaabotonoo kon.

⁴⁸ Bay mawbe makkun ɓen yi'ii kun, ɓe ȝaldi, neene makkun wi'i kun: «Boobo an, ko hondun wadandaa men dun? E hino dun fow min e ben maa meden dabbitude ma e nder sokola!»

⁴⁹ Kun wi'i ɓe: «Ko fii hondun dabbitirton mi? Hari on andaa mido haani wonude ka suudu Ben an?»⁵⁰ Kono kambe ɓe faamaali ngol kongol ngol kun haalani ɓe.

⁵¹ Ontuma kun yiltodi e mabbe Naasirata, kun yankinanii ɓe. Neene makkun mari din piiji fow ka bernde mun maanditii. ⁵² Tawi kun paykun, dun ko Iisaa, no mawnude tun, faamu makko on kadi ko yeeso tun woni yaarude, himo beydoo tun welude Allaahu on e yimbe ɓen.

Fii Waaju Yaayaa ngun

(Mat. 3.1-12; Mrk. 1.1-8; Yhn. 1.19-28)

3¹ Ka laamu Tibariiyu hebi duubi sappoo e jowi don, dun ko lando mawdo Roomu on, fewndo onsay hari ko Pilaatu Pontii woni lando diiwal Yahuuda ngal, tawi ko

^c2.41 Egg. 12

*Heroodu laamii diiwal Jaliilu ngal, tawi ko Filiipu mijjniraawo makko on kadi laamii dee leyde doo, dūn ko Ituuriya e Taraahuuniti, tawi ko Lisaaniiyu laamii diiwal Abiliiya ngal,² fewndo Hannaana e Qayaafa wonnoo *yottinoobe mawbe sadaka, Allaahu on daalanno Yaayaa mo Zakariyaa'u ka wulaa.³ Onsay Yaayaa yahi daande Yurdayniwol fow himo waajoo yimbe ben yo be aru be *lootee maande tuubuubuyee fii yo junuubaaji mabbe din yaafe⁴ wano windori non ka deftere fii dii kongudi annabi *Isaaya:

«Kaa hawa ko hawa ewnotoodo ka wulaa, wi'a:

Moyýinee laawol Joomiraado on,
fewnon juri makko din.

⁵ Ayde den fow uddete,
pelle njane e tosooke den fow joltinee.

Date boyliide den fewnee,
laawi kaanudi din newdinee.

⁶ Kala neddanke yi'ay kisiyee iwrudo ka Alla on.»^d

⁷ O wi'ayno din jamaaji araydi e makko fii *lootegol maande tuubuubuyee: «Ko onon yo iwdi kuura! Ko hombo tindini on dogugol tikkere aroyaynde nden?⁸ Awa yo kuude mon den hollu wonde on tuubii. Hara on hooloraali wi'ugol wonde ko Ibraahiima woni maama mon, ko fii mi andinii on, Alla no waawi wattude dee kaaye doo bibbe Ibraahiima.⁹ Toode teenirde nden no waalii ka binde ledde. Kala leggal ngal rimataa bibbe moyýube, ngal soppete, ngal bugee ka yiite!»

¹⁰ Onsay yimbe ben landii mo: «Ko hondun men wadata jooni?»

¹¹ O jaabii be: «Kala mardo dolokkaaji didi yo sendodu di e mo maraa. Kala jogido kadi jaametee yo o warru wano non.»

^d3.6 Isa. 40.3-5

¹² Yantooбе* sagalle бен ари е макко фи лоотегол маанде туубуубууын, бе wi'i мо: «Карамоко, ко хондун мен хаани вадуде?»

¹³ О wi'i бе: «Wota on yantu тоонин ко yamiradon kon.»

¹⁴ Suufaaбе goo kadi landii mo: «Menen-le, ко хондун мен хаани вадуде?»

О jaabii бе: «Wota on jattu hay gooto kaalisi, wota on ittin hay gooto e hoore тооне, yo njoddi mon ndin yonu on.»

¹⁵ Tawi mo bee e mabbe no miijotonoo ka бернде mun si tawii wonaa Yaayaa woni *Almasiihu on, ко fii hari jamaa on no sabbinoon. ¹⁶ Kanko Yaayaa o jaabii бе, о wi'i: «Min, ко ndiyan mi woni on lootirde, kono burdo lan doole on, mo mi hewtaa hay firtugol boggi pade mun, no arude. On non ko *Ruuuhu Seniido on e yiite o lootirta on. ¹⁷ Himo jogii feeteewo makko ngon ka jungo, ко o hentinira bete^d makko on, о mooba jaametee on ka beembal makko, о sunnira foron on yiite nge daanotaako.»

¹⁸ Tawi Yaayaa no fejnjinanaynoo jamaa on Kibaaru Moyyo wondude e waajuuji heewudi. ¹⁹ Kono bay Yaayaa felii *Heroodu lando diwal ngal, sabu ko on resi sonnaajo yumma-gooto mun on kon, дун ко debbo wi'eteedo Heroodiiya, wondude e kala bonnereeji di o wadaynoo, ²⁰ onsay Heroodu beyditiri дун hendagol Yaayaa, сока мо.

Fii no Iisaa Lootiraa

(Mat. 3.13-17; Mrk. 1.9-11)

²¹ Fewndo ко jamaa on fow ари fii lootegol маанде туубуубууын, Iisaa kadi lootoraa. Fewndo ко o du'otoo, kammu ngun udditii, ²² Ruuhu Seniido on yetti mbaadi gabooru tippii е makko. Onsay hawa nanii ka kammu, no wi'a: «Ko an woni Biddo an yidaado on, mido weltor-maa.»

^d3.17 Maa: «gete».

Fii Iwdi Iisaa ndin

(Mat. 1.1-17)

²³ Ko Iisaa fuddii waajaade, ko wa mo duubi cappande tati. Ko o tuumanoodo wonugol gedal Yuusufu, on biddo Helii, ²⁴ mo Matsaata, mo Lewi, mo Malkii, mo Yannaa, mo Yuusufu, ²⁵ mo Mataasiyaa, mo Amuusa, mo Naahuuma, mo Haslii, mo Najji, ²⁶ mo Maasa, mo Mataasiyaa, mo Sim'ii, mo Yuusuka, mo Yahuuza, ²⁷ mo Yuuhanna, mo Reesa, mo Zarubaabila, mo Sa'alti'iila, mo Neerii, ²⁸ mo Malkii, mo Addii, mo Qusaama, mo Almudaama, mo Iiri,

²⁹ mo Yuusii, mo Aliyaasaru, mo Yuriima, mo Matsaata, mo Lewi, ³⁰ mo Sim'uunu, mo Yahuuda, mo Yuusufa, mo Yuunaana, mo Alyaqiima, ³¹ mo Malayaa, mo Maynaana, mo Mataasa, mo Naasaana, mo Daawuuda, ³² mo Yassaa'u, mo Obiida, mo Bo'aaza, mo Salmaana, mo Nahasuuna, ³³ mo Ammiina-Daaba, mo Adumiina, mo Arnii, mo Hasruunu, mo Faarisa, mo Yahuuda,

³⁴ mo Yaaquuba, mo Issaaqa, mo Ibraahiima, mo Taaraha, mo Naahuura, ³⁵ mo Seruuja, mo Ra'uwa, mo Faalaja, mo Aabira, mo Saalaha, ³⁶ mo Kiinaana, mo Arfaksaada, mo Saama, mo Nuuhu, mo Laamaka, ³⁷ mo Matuusaalah, mo Hanuuka, mo Yaarada, mo Mahalaliila, mo Kiinaana, ³⁸ mo Anuusa, mo Siita, mo *Aadama, mo Allaahu on.

Fii no Ibiliisa Ndarndori Iisaa

(Mat. 4.1-11; Mrk. 1.12-13)

4 ¹Iisaa iwi Yurdayniwol no heewi *Ruuhu Seniido on. Ruuhu on nawri mo ka wulaa. ²Ko ton Ibiliisa ndarndii mo fodde balde cappande nay. O jaamaali hay fus e nder den balde don fow. Bawto dun o weelaa.

³ Onsay Ibiliisa wi'i mo: «Si tawii ko a *Biddo Alla, yamir ndee hayre yo nde wontu jaametee.»

⁴ Iisaa jaabii mo, wi'i: «No windii wondema: <Neddo hinaa naametee tun
wuurirta.»^e

⁵ Onsay Ibuliisa nabi mo ka buri toowude, o holli mo laamateeriji aduna on fow
yeru hinyaango yiitere. ⁶ O wi'i mo: «Mi jonnete laamu e hoore majji di fow
wondude e darja majji on, bay mi jonnanooma di, awa-le mi okkay di mo mi
faalanaa woo. ⁷ Si tawii a sujjanii lan, dii fow wontante.»

⁸ Iisaa jaabii mo, wi'i: «No windii wondema: <Ko Alla Joomiraado maa on
sujjantaa, rewa mo kanko tun.»^f

⁹ Ibuliisa nawri mo kadi Yerusalaam, joddinoyi mo ka hoore warnakere *juulirde
mawnde, o wi'i mo: «Si tawii ko a Biddo Alla, hocco don, cikkodaa ka leydi, ¹⁰ ko
fii no windii wondema: <O yamiray malaa'ikaabe makko ben fii maa, yo be reene,
¹¹ awa kadi be tamborte juude mabbe den fii wota koyngal maa ngal feggo e
hayre.»^g

¹² Iisaa jaabii mo, wi'i: «No windii wondema: <Wota a ndarndo Joomiraado on, on
Alla maa.»^h

¹³ Bay Ibuliisa lannii mo ndarndaade e dii doo fow, o pottitii mo haa o eeba feere
goo.

Fii Golle Iisaa den Jaliilu

(Mat. 4.12-17; Mrk. 1.14-15)

¹⁴ Iisaa yiltodi e bawgal Ruuhu Allaahu on ka diiwal Jaliilu. Fii makko andii e
nokkeeli heedudi don din fow. ¹⁵ O jannayno ka juulirde mabbe. Yimbe ben fow
manti mo.

^e4.4 Yaj. 8.3

^f4.8 Yaj. 6.13

^g4.11 Zab. 91.11-12

^h4.12 Yaj. 6.16

¹⁶ O yahi Naasirata ka o ne'aa dñon. E *jalaande fowteteende nden, dun ko asewe, o naati ka juulirde wano o woowiri non. O immii fii jangugol. ¹⁷ O jonnaa deftere annabi Isaaya nden, o udditi nde, o hawrondiri e cortewol ka dundoo windii:

¹⁸ «Ruuhu Joomiraado on no e hoore an,
sabu ko min woni Subaado on
fii fejjinangol miskinbe ñen Kibaaru Moyýo on.

O nelii lan

fii hollitugol nangaabe ñen hettugol hoore mun,
hollita bumbe ñen hettugol giide mun den,
hollita njaggaabe ñen kadi hettugol hoore mun,

¹⁹ e fii humpitugol on ndee hitaande nde Joomiraado on wadi moyýere mun
nden e mun.»ⁱ

²⁰ Ontuma o nobbi deftere nden, o jonni nde wallitotoodo on, o jottii. Tawi yimbe ñen fow ka nder juulirde no punnii mo. ²¹ Onsay o wi'i be: «Oo daaluyee mo nanirdon noppi mon din laatike hande.»²² Fow seeditanii mo, ñaldidi e din kongudi makko moyýi ði o yewtaynoo, hibe wi'a: «Wonaa biddo Yuusufu on nii?»

²³ Iisaa wi'i be: «Mido andi on wlanay lan ngol tindol doo: Nawndoowo, ñawndu hoore maa tigi. Kala ko men nani wadii Kafernahuum, wadu dun kadi ka leydi maa doo.»²⁴ O wi'i be kadi: «Mi wlanay on haqiqiqa, annabaajo hay e gooto teddinaaka ka leydi mun. ²⁵ E hino goonga ko mi woni on wolande: E fewndo jamaanu Iiliya, hari keynguube buy no woodi e nder leydi Isra'iila. Ko fewndo onsay wonnoo duubi tati e lebbi jeegoo kammu ngun no uddii ndiyan dan tobbäali, heege tiidunge wadi e leydi ndin fow, ²⁶ kono hari Iiliya nulaaka e hay gooto e ben keynguube, si hinaa e debbo keynguugo mo Sarfati, dun ko e nder leydi Siduuna. ²⁷ Tawi kadi e fewndo jamaanu annabi Iliyasa, be damajan buy no

ⁱ4.19 Isa. 61.1-2

leydi Isra'iila, kono hari hay gooto e maabbe sellinaaka, si hinaa oo Siriyankeejo wi'eteedo Na'amaana.»

²⁸ Bay be nanii dii kongudi makko, wonnoobe ka nder juulirde ben fow tikki.

²⁹ Be immii, be dupiri mo ka baawo saare, be nabi mo haa ka fello ngon yellitii don fii bugagol mo ley. Tawi nden saare ko e falo ngon fello darnaa. ³⁰ Kono o ukkitii hakkunde maabbe, o feyyi, o yahi.

Fii no Iisaa Radori Jinna, Nawndiri Nabbeeli Buy

(Mrk. 1.21-28)

³¹ Iisaa yahi Kafernahuum, nden saare ko jeyaande e diiwal Jaliilu, himo janna e jalaande fowteteende nden, dun ko aseweere nden. ³² Ko o jannaynood kon yaldini jamaa on, sabu himo wowliraynood bawgal.

³³ Tawi no ka nder juulirde ton neddo mo jinnawii bonngii nangi, on sonki, wi'i:

³⁴ «Hey, ko hondun faalanadaa men, an Iisaa oo jeyaado Naasirata? Hara ko mulugol men arandaa? Min mido andi ko hombo wonu-maa, ko a *Seniido mo Alla!»

³⁵ Onsay Iisaa yamiri ngii, wi'i: «Fanku, yaltaa e oo neddo!» Jinnawii ngin libi mo hakkunde maabbe, ngii yalti e makko, ngii barminaali mo.

³⁶ Fow yaldi, no wi'indira: «E ko hondun woni ngol kongol? Oo no yamira jinnaaji bondi din e hoore doole e bawgal, di yalta!» ³⁷ Kibaaru fii makko lolli e nokkeeli heedudi don din fow.

³⁸ Bay o iwii ka juulirde, o yahi ka galle Sim'uunu. Tawi esiraawo Sim'uunu suddiido on no nawni nawnaare nguli-bandu tiiduki. Be torii mo kanko Iisaa ballal. ³⁹ O ugginii e hoore makko, o yamiri nawnaare nden, nde yalti e makko. Don kisan on immii, o woni e kurkanagol be.

⁴⁰ Bay naange ngen mutii, kala marnoobe jawdo noone jaw fow, be addi be e makko. O *fawi juude makko den e hoore mo kala e maabbe, o sellini be. ⁴¹ Tawi

kadi jinnaaji no yaltude e buy e mabbe, hara hidî sonka, wi'a: «Ko an woni Biddo Alla on!» Kono o tonjani dî, o salii dî wowla, bay hari hidî andi ko kanko woni *Almasiihu on.

⁴² No weetirnoo bimbi, Iisaa yalti yaari e nokkuure wuldinnde. Jamaaji din woni e dabbitugol mo, be ari haa e makko. Be faalaa mo tongude don, hara o accaali be don. ⁴³ Kono o wi'i be: «Bee mi fejjinana deya ca'e kadi Kibaaru Moyyo on, dun ko kibaaru fii *laamu Alla ngun, sabu ko fii dun mi neliraa.»⁴⁴ Onsay o woni e waajagol ka juulirde diiwal Yahuuda.

Fii Taalibaabe be Iisaa Adii Noddude ben

(Mat. 4.18-22; Mrk. 1.16-20)

5 ¹Nande goo, tawi Iisaa no e daande nduu *Weendu Jaani-Saarata. Tawi jamaa no dunindira e fee makko fii hedagol daaluyee Allaahu on. ²O haynii laakoy didoy ka sera weendu, tawi yungoobe ben no jippii fii lootugol *jalaaji mabbe din. ³O yawi e gokkun e koy laakoy, dun hawrondiri e kun Sim'uunu kun, o yamiri ondon woddintingol be pencen on seeda. Ontuma o joodii e nder makkun, o woni e jannugol jamaa on.

⁴ Bay o gaynii jannude, o wi'i Sim'uunu: «Nawru laakun kun ka luggi don, bugodon jalaaji mon din, nangon liyyi.»

⁵ Sim'uunu jaabii mo: «Jom amen, oo jemma feyudo doo fow meden yungude, men hebaali hay fus. Kono sabu ko maakudon kon, mi bugoto jalaaji din.»

⁶ Bay be wadii dun, be nangi liyyi duudsudi, benii jalaaji mabbe din fuddii tayude.

⁷ Onsay be baayi beya wondibbe mabbe wonbe e kuma laakun fii ko ara wallitoo be. Ben ari be hebbini laakoy koy didoy non, haa koy faalaa mutude.

⁸ Bay Sim'uunu Petruusu yi'ii dun, o yani e ley koyde Iisaa, o wi'i: «Koohoojo an, wodsitee lan, sabu min ko mi junuubankeejo!»⁹ Jalaw hefi mo, hebidi mo e be o

wondunoo ben fow, sabu ngol nangugol din liyfí. ¹⁰Ko wano non kadi Yaaquuba e Yuuhanna bee bibbe Zabadii wondibbe Sim'uunu ḥaldirnoo.

Onsay Iisaa wi'i Sim'uunu: «Wota a hulu, gila jooni a wonay yungoowo yimbe.»¹¹ Onsay be artiri laakoy koy ka pency, be acci fow don, be jokki mo.

Fii no Iisaa Nawndiri mo Damajan

(Mat. 8.1-4; Mrk. 1.40-45)

¹²Tawi Iisaa no e saare goo. Onsay mo damajan heewi e bandu mun yi'i mo, ari yani yeeso makko. O jeeji mo, o wi'i: «Koohoojo, si hidon faalaa, hidon waawi lan sellinde, mi laaba!»

¹³Iisaa fonti jungo mun ngon, meemi mo, wi'i: «Mido faalaa, laato selludo laabaa.» Don kisan damajan dan yalti e makko.

¹⁴Onsay o wi'i mo: «Wota a wowlan dun hay gooto. Kono non a yahay hollitoyodaa *yottinoowo sadaka on, ittaa sadaka fii ko labbinadaa kon wano Muusaa yamiri non fii yo dun wonan be seedee.»

¹⁵Kono tawi innde makko nden no burtude lollude, jamaaji buy moobii fii jentagol mo e fii jawndegol nabbeeli maħħe, ¹⁶kono tawi Iisaa no woowunoo pottitaade ka weddii, toroo Alla.

Fii no Iisaa Imminiri Maaya-Banduujo

(Mat. 9.1-8; Mrk. 2.1-12)

¹⁷Nande goo tawi Iisaa no jannude. Hari *Fariisiyaabe e jannoobe fii Sariya on no joodii don, hibe iwri e kodooli diwal Jaliilu ngal fow e diwal Yahuuda ngal e ka saare Yerusalaam. Tawi bawgal Joomiraado on no wondi e makko no o jawndira. ¹⁸Tawi kadi wobbe arii no rondii jukkudo e boggi-dimbordi. Hibe dabba fii no be naadira mo ka nder suudu, be wallina mo yeeso Iisaa. ¹⁹Bay be hebaali ka be naadira mo sabu duudugol jamaa on, be yawdi e makko ka hoore suudu, be tufi

ton yolnde, ɓe tippindini mo e boggi-dimbordi din e hakkunde jamaa on yeeso Iisaa.

²⁰ Bay Iisaa yi'ii gomdinal mabbe ngal, o wi'i: «Musiddo, junuubaaji maa din yaafaama.»

²¹ Onsay Fariisiyaabe ɓen e jannoobe fii Sariya on woni e wi'indirgol: «Ko hombo woni oo hoynoowo? Ko hombo waawi yaafaade junuubu ko wonaa Alla?»

²² Iisaa andi din miijooji mabbe, o wi'i: «Ko hondun miijantodon dun ka berde mon? ²³Enee, hakkunde wi'ugol 〈junuubaaji maa din yaafaama〉 e 〈immo yahaa〉, ko hondun e dii doo buri weebude?»²⁴ O wi'i kadi: «Fii no andiron wonde *Bii-Aaden on no mari bawgal ka aduna doo fii yaafagol junuubaaji», o wi'i jukkudo on: «Immo yettaa boggi-dimbordi maa din, hootaa ka maa.»²⁵ On immii don kisan e tawnde mabbe, o yetti boggi-dimbordi makko din, o hooti ka makko, himo manta Alla. ²⁶Kaawee hebi ɓe fow, ɓe manti Alla, ɓe huli fota, hibe wi'a: «Hande men yi'ii huunde hawniinde!»

Fii no Matta Jokkiri Iisaa

(Mat. 9.9-13; Mrk. 2.13-17)

²⁷ Bawto dun, Iisaa yalti. Ko o yahata, o yi'i yantoowo sagalle wi'eteedo Lewi no joodii ka yantirde sagalle. O wi'i: «Aru jokkaa mil!»²⁸ Lewi acci don ko o joginoo kon fow, o immii, o jokki mo.

²⁹ Lewi wadani mo caatal mawngal ka mun, yimbe buy yantoobe sagalle wondude e yimbe goo joododi e mabbe. ³⁰Fariisiyaabe ɓen e jannoobe fii Sariya on jeyaabe e fedde mabbe nden ɻuni taalibaabe Iisaa ɓen, ɓe wi'i ɓe: «E ko fii hondun naamidanton, yaridon e junuubankeebe ɓen e yantoobe sagalle ɓen?»

³¹ Iisaa jaabii ɓe, wi'i: «Hinaa sellube ɓen hatonjini e jawndoowo, kono ko jawbe ɓen. ³²Min, wonaa noddugol feewube ɓen mi arani, kono ko junuubankeebe ɓen fii yo ɓe tuubu.»

Landal fii Hoorugol

(Mat. 9.14-17; Mrk. 2.18-22)

³³ Onsay wobbe wi'i mo kanko Iisaa: «Taalibaabe Yaayaa ben e taalibaabe Fariisiyaabe ben kajun hooray, juula soono woo. An-le, be maa ben no jaamude, yara!»

³⁴ Iisaa jaabii be wi'i: «Taw si on waaway hoorinde njaatigiibe jom jomba nande peera on, hara himo wondi e mabbe? ³⁵ Aray e saa'i nde jom jomba pottinaa e hakkunde mabbe, onsay e den balde don be hooray.»

³⁶ O haalani be ngal misal doo, o wi'i: «Hay gooto yettataa ceelol bagi keso, walkira dolokke kiddo. Si hinaa dun, haray ontigi bonnii kesun dun, walkere nden kadi yaadataa e kiddun dun. ³⁷ Hay gooto loowataa njaram *wijnu kesan e nder bootooji guri kiddi. Si hinaa dun, dan njaram kesan wonay sabu ko feeri din guri, njaram dan hibba, bootooji guri din kadi bona. ³⁸ Kono njaram kesan ko e nder bootooji guri kesi loowetee. ³⁹ Kala yarudo njaram kiddan faaletaake njaram kesan, ko fii o wi'ay: «Ko kiddan dan buri welude.»»

Landal fii Nalaande Fowteteende nden

(Mat. 12.1-8; Mrk. 2.23-28)

6¹ E aseweere goo, dun ko *jalaande fowteteende nden, hari Iisaa no rewude e gese ngawri, taalibaabe makko ben no woocora cawti den gese, worsa di, jaama.

² Fariisiyaabe* goo wi'i: «Ko hondun wadanton koo ko dagaaki e jalaande fowteteende nden?»

³ Kono Iisaa jaabii be, wi'i: «Hara on jangaali ko Daawuuda wadunoo kon fewndo o weelaa, kanko e yimbe wondunoobe e makko ben? ⁴ O naati ka nder suudu Alla, o yetti bireedijje weebitaade fii sadaka den, o jaami ko daganinoo *yottinoobe sadaka ben tun kon, o okkori kadi wondube e makko ben.»⁵ Onsay o wi'i: «Ko *Bii-Aaden on woni jom jalaande fowteteende nden.»

Fii no Iisaa Selliniri Maaya-Jungoojo

(Mat. 12.9-14; Mrk. 3.1-6)

⁶E aseweere goo, Iisaa naati ka juulirde, o woni e jannugol. Tawi godđo no nder ton mo jungo mun jaamo maayi. ⁷Nde tawnoo jannoobe fii Sariya on ben e Fariisiyaabe ben no faalaa hebude ko 6e lamitora, 6e toona Iisaa, tawi hibe ndaara si o nawnday e asewe, dün ko nalaande fowteteende nden. ⁸Kono tawi Iisaa no andunoo dün mijooji mađbe. Onsay o wi'i maaya-jungoojo on: «Immo darodaa ka hakkunde doo.» On immii, darii.

⁹Onsay Iisaa wi'i 6e: «Mi landike on, hara no dagii ka godđo wada ko moyyi maa ko boni, danda wonkii maa wona sabu makki e aseweere?»¹⁰Onsay o ndaari 6e fow, o wi'i on nedđo: «Fontu jungo maa ngon.» On fonti ngo, jungo makko ngon selli. ¹¹Dun tikkini Fariisiyaabe ben e jannoobe fii Sariya on ben fota, 6e woni e yeddondirgol ko hondun 6e wadata Iisaa.

Fii no Iisaa Subori Sahaabaabe mun ben

(Mat. 10.1-4; Mrk. 3.13-19)

¹²E nder den balde don, Iisaa yaari ka fello fii toragol Alla, o waali toraade. ¹³Bay weetii, o noddi taalibaabe makko ben, o subii sappoo e dido e mađbe, o toddii 6e *sahaabaabe: ¹⁴dün ko Sim'uunu, on mo o jammi Petruusu, e Andaraawu neene-gooto Sim'uunu on, e Yaaquuba e Yuuhanna e Filiipu e Bartolomaawu ¹⁵e Matta e Tooma e Yaaquuba mo Alfaa e Sim'uunu tawdaado e fedde *Zelotiibe ben, ¹⁶e Yahuuda mo Yaaquuba e Yudaasi Iskariiyu, janfoytoodo mo on.

Fii Waaju ngun ka hoore Fello

(Mat. 4.23-25; Mrk. 3.7-11)

¹⁷Iisaa jippodi e ben taalibaabe 6e o subii, o darii e nokkuure ndeylere ka falo. Tawi taalibaabe makko duudube no e nden nokkuure, wondude e jamaa

moolanaado iwrudo e cende den fow e diiwal Yahuuda ngal e saare Yerusalaam
nden e dii baŋjeeji Tiiri e Siduuna ka daande baharu.¹⁸ Ben ko arnoobe hedagol
mo e fii nawndegol njabbeeli mun. Be jinna tampinnoo ben sellinaa.¹⁹ Awa kadi
mo kala e maňbe no faalanoo mo meemude, ńay himo wondunoo e bawgal
njawndaynoongal ńe fow.

²⁰ O ńanti gite makko ñen, o ndaari taalibaabe ben, o wi'i:

«On malii yo onon miskinbe,

ńay *laamu Alla ngun ko onon wonani.

²¹ On malii yo onon weelaabe fewndo doo,

ńay on harnoyte.

On malii yo onon wulloobe fewndo doo,

ńay on weltoyo.

²² On wonay malaabe nde yimbe ben aji on

e nde ńe radii on, ńe yenni on,

ńe njiddini inde mon den sabu Bii-Aaden on.

²³ Nden jnande, weltee, jijnon welo-welo,

ńay hidon maranaa njoddi mawndi ka kammu,

ko fii ko nii kadi mawbe maňbe ben warraynoo annabaabe ben.

²⁴ Kono bone wonanii on onon aldube ben,

ńay on hendike neweende ko mon kon!

²⁵ Bone wonanii on onon bee haaruibe jooni,

ńay on weeloyte.

Bone wonanii on onon bee jaloobe hande,

ńay on yoomoyay wullon.

²⁶ Bone wonanii on nde yimbe ben fow wowli on ko moyyi,

ńay ko non mawbe maňbe ben wowliraynoo

fii bee waditiibe annabaabe.»

Fii Yidugol Aybe mun

²⁷ «Kono min mi wi'ay on yo onon bee hediibe lan: Yidee aybe mon ben, moyfodon e anube on ben, ²⁸ du'anodon hudoobe on ben, toranodon tampinoobe on ben. ²⁹ Mo bantike ma e wabbugo, tudan mo ngoya kadi. Mo jattii ma waramba, wota a hadu mo yettude fokiya on kadi. ³⁰ Okkor kala toriido ma, hara kadi a yantaali ko maa kon e juude jattube ma ben. ³¹ Wadanee yimbe ben wano faaliradon yo be wadan on non.

³² «Si on yidii yidube on ben, haray ko moyere honde heboyton? Ko fii hay junuubankeebe ben no yidi yidube be ben. ³³ Si on moyyike e moyyiibe e mo'on ben, haray ko moyyere honde heboyton? Hay junuubanke'en ko non warrata. ³⁴ Si on jawlili be tanyinidon yobitay on ben, haray ko moyyere honde heboyton? Hay junuubanke'en jawlindiray fii yo be yobitindir. ³⁵ Kono yidee aybe mon ben, wadanon be ko moyyi, jawlon be hara on habbaaki yobiteede. Dun on heboyay njoddi mawndi, wonoyon kadi bibbe Jom Bural on, sabu himo moyyani dullube ben e bonbe ben. ³⁶ Wonee yurmeteebe wano Baaba mon Jom Bural on woniri Yurmeteedo non.»

Fii Naawitagol

(Mat. 7.1-5)

³⁷ «Wota on jaawu, dun on jaawetaake. Wota on felu, dun on feletaake. Yaafee, dun on yaafoyte. ³⁸ Okkee, dun on okkorte. On etirante sariyaare yedsfunde, timmunde, yeayaande haa juuri, wadanedon ka jiifaaji mon. Ko fii ko sariyaare nde etirdon nden etirantedon.»

³⁹ O wowlani be ngal misal doo, o wi'i: «Hara bundo no waawi dowude bundo? Hara be didoo non be yanidaali e nder ngayka? ⁴⁰ Taalibaajo buraa karamoko mun. Kono kala taalibaajo eltiido wa'ay wa karamoko mun.

⁴¹ «Ko honno yiirataa lojol wongol ka yiitere musidđo maa on, hara a yi'aali falimawal wongal ka yiitere maa ngal? ⁴² Ko honno wawrataa wi'ude musidđo maa: ‹Musidđo, accu mi ittane lojol ngol ka yiitere maa›, hara an, a wattanaali yiila e falimawal wongal ka yiitere maa ngal? Ko an yo faasiqijo, ittu taho falimawal wongal ka yiitere maa ngal, onsay non a yi'ay no ittiranaa musidđo maa on lojol wongol ka yiitere makko ngol.»

Misal Yettaangal e Leggal e Bibbe Mun

(Mat. 7.16-20, 12.33-35)

⁴³ «Leggal moyyal rimataa bibbe bonbe, wano non kadi leggal bongal rimataa bibbe moyyube. ⁴⁴ Leggal kala no anditree bibbe mun: ko fii on ittataa yibbe e bulle-kopon, wano non kadi on ittataa sungala^j e bulle-bete. ⁴⁵ Neddo moyyo on yaltinay moyyere ka moyyuki bernde mun, neddo bondo on kadi yaltina bonki ka bonki mun, ko fii ko ko heewi e bernde woo hunduko wowlata.»

Fii Ninnugol Waajuuji din

(Mat. 7.24-27)

⁴⁶ «Ko fii hondun noddanton mi ‹Koohoojo, Koohoojo›, hara on wadataa ko mi wi'i on kon? ⁴⁷ Kala neddo ardo e an, nani waajuuji an din huutori di, mi hollay on no on wa'i. ⁴⁸ On no wa'i wa darnudo suudu. Hara o jasu gaawol luggungol haa e fetere, o fuddii don mahude. Nde waamere nden wadi, ndiyan dan ari e suudu ndun, dan waawataa ndu dillinde, ko fii daroodi mayru on no tiidi. ⁴⁹ Kono kala nanudo kongudi an din, huutoraali di, on no wa'i wa darnudo suudu ndu jasanaaka gaawol. Ilol ndiyan dan hawri e mayru tun, ndu yani kisan, fii mayru on mula few.»

^j6.44 Maa: «sumbala».

Fii Kurkaadu Suufaajo on

(Mat. 8.5-13; Yhn. 4.46-54)

7¹ Bay o gaynii waajaade jamaa heditiido mo on, o naati Kafernahuum. ² Tawi hooreejo suufaabe teemedere no mari kurkaadu ndu o yidunoo, hari ndun no nawni haa moggo mayde. ³ Bay o nanii fii Iisaa, o nuli mawbe *Yahuudiyankeebé goo e makko fii toragol mo arugol nawndana mo ndun kurkaadu makko. ⁴ Bay be arii be tawii Iisaa, be jeeji mo be multi, be wi'i: «Himo handi e wadaneede dün, ⁵ ko fii himo yidi lejol men ngol, awa-le kadi ko kanko darni juulirde amen nden.»⁶ Iisaa yaadi e mabbe.

Bay o battike suudu hooreejo suufaabe ben, on suufaajo nuli yibbe mun goo e Iisaa ko wi'a mo: «Koohoojo, wota on tampintino, sabu mi foddaa e mo'on ka suudu an. ⁷ Ko dün wadi si min tigi mi foddaa e arugol haa ka mon. Kono maakee tun kongol gootol, kurkaadu an ndun ndikkay. ⁸ Ko fii min tigi ko mi wondo e ley kongol hooreebe goo, min kadi mido mari suufaabe wonbe e ley kongol an. Si mi wi'ii goddo e ben 〈yahu〉, o yahay. Si mi wi'ii oya on 〈aru〉, o aray. Awa kadi si mi wi'ii kurkaadu an ndun 〈wadu dun〉, ndu waday.»

⁹ Bay Iisaa nanii din kongudi makko, o ɻaldi, o fewti e jamaa jokkudo mo on, o wi'i be: «Mi andinii on, hay ka *Isra'iila'en mi yi'aali neddo gomdinirdo wa oo.»¹⁰ Bay nulanoobe ben yiltitike ka suudu, be tawti kurkaadu nawnunoondū ndun ndikkii.

Fii no Biddo Keynguujo on Wurnitiraa

¹¹ E nder den balde don, Iisaa yahi e saare wi'eteende Naa'ina, taalibaabe makko ben wondude e jamaa duududo yaadi e makko. ¹² Ko o hewtaynoo ka naatirgal saare, o fotti e rondiibe furee, hari on furee ko biddo bajjo ka neene mun, tawi kadi neene makko ko keynguujo. Tawi jamaa duududo e nden saare no wondi e on debbo.

¹³ Bay Koohoojo on yi'ii on keynguujo, o yurmaa mo, o wi'i mo: «Wota a wullu!»¹⁴ O badii furee on, o *fawi jungo makko ngon e hoore goyki kin, ronduibe furee on dartii, o wi'i: «Suka, mi yamirii ma yo a immo!»¹⁵ Onsay maydo on immii joodii, o fuddii yewtude. Iisaa jonniti mo yumma makko.

¹⁶ Be fow 6e huli, 6e manti Alla, 6e wi'i: «Annabaajo keldudo feejii e fewndo men. Allaahu on arii faabagol yimbe mun 6en!»¹⁷ Fii ngal kuugal makko lolli e diwal Yahuuda ngal haa e bañjeeji heedudi don din fow.

Fii Lande Yaaya den

(Mat. 11.2-19)

¹⁸ Taalibaabe Yaaya ben humpiti mo kanko Yaaya kon ko wadi fow. ¹⁹ Yaaya noddi dido e taalibaabe mun 6en, o immini 6e e Koohoojo on yo 6e lando mo: «Taw si ko onon woni haanudo arude on, kaa hara yo men habbo goddo goo?»

²⁰ Bay ben imminaabe hewtii, 6e wi'i Iisaa: «Ko Yaaya *lootoowo maande tuubuubuyee on immini men haa e mon fii landagol on si ko onon woni haanudo arude on, kaa hara yo men habbo goddo goo?»

²¹ Ko e on saa'i mo 6e hewti e mun tigi, Iisaa sellini nawbe e jukkube buy e jinnaabe, o wontini kadi bumbe buy. ²² Ontuma o jaabii 6en 6e Yaaya immini, o wi'i 6e: «Yahee fillitanodon Yaaya ko yi'udon kon e ko nanudon kon wonde, bumbe 6en yi'ii, boofoobe 6en yahii, 6e damajan 6en sellinaama, 6e laabii, pahidube 6en nanii, maybe no immintineede, Kibaaru Moyyo on no fejnjinaneede miskinbe 6en. ²³ Kala mo feggaaki e an ko malaado.^k

²⁴ Bay 6en 6e Yaaya nelunoo yiltitike, onsay Iisaa fuddii yewtude jamaa on fii Yaaya, o landii 6e dundo, o wi'i: «Ko hondun yahunodon ndaaroygol ka wulaa? Hara ko kudol ngol hendu ndun dimbata? ²⁵ Kaa ko hondun yahunodon ndaarugol? Ko neddo borniido conci dimi? Ndaaree bee borniibe conci dimi,

^k7.23 Maa: «Kala mo ronkaali gomfinde lan ko malaado.»

wuurube ngurndan moyyan no e nder galleeji laamu.²⁶ Ko hondun non yahunodon ndaarugol? Ko annabaajo? Hiiyii, min mi wi'ay on, ko koburi annabaajo.²⁷ Ko oo doo woni mo fii mun windii on:

«Awa, mido imminde nulaado an on yeeso maa,
fii ko fertano-maa laawol maa ngol.»^m

²⁸ «Mi andinii on, alaa mo suddiido jibini burdo Yaaya. Kono non burdo fandude on ka laamateeri Alla no buri mo teddude.»

²⁹ (Jamaa hedinoodo mo on e yantoobe sagalle ben jabi laawol Alla feewungol ngol e nder ko be lootanoo maande tuubuubuyee ko Yaaya lootaynoo kon.

³⁰ Kono Fariisiyaabe ben e waawube fii Sariya ben bugitii ko Allaahu on ebbannoo be kon, be salii Yaaya loota be maande tuubuubuyee.)

³¹ «Hara ko e hondun mi ebbindirta bee yimbe nguu jamaanu? E ko hondun be nandi?³² Hibe nandi e faybe joodiibe e kubitirde, hara ben no noddindira, wi'a:

«Men wuttanii on ceri, on amaali,
men yimanii on gimdi yurmudi, on wullaali!»

³³ «Ko fii Yaaya lootoowo maande tuubuubuyee on arno, o jaamataano ko defaa, o yarataano ko mandilinta, wi'udon: «On ko mo jinna!»³⁴ Bii-Aaden* on kadi arii no jaama no yara, wi'udon: «On ko reeredudo, yaroowo, weldudo eyantoobe sagalle e junuubanke'en!»³⁵ Kono jabube faamu Allaahu on ben hollay wonde ko ngu feewungu.»

Fii no Debbo Junuubankeejo on Yaaforaa

³⁶ Fariisiyaajo goo wi'eteedo Sim'uunu torii Iisaa hawtidugol e makko. Iisaa naati ka suudu Fariisiyaajo on, o toolii fii nafagol.³⁷ Tawi debbo junuubankeejo no e nden saare, on humpitii Iisaa no nafaade ka suudu Fariisiyaajo on. O ardi e tindohun hayre daneere tew angiri,³⁸ o wontiri baawo Iisaa, o ugginii ka hoore

^m7.27 Mal. 3.1

koyde makko, o wulli haa gondi makko din bubbyni koyde lisaa den. Ontuma debbo on fittiri de sukundu mun ndun, o lunnii de, o wuji de angiri.

³⁹ Bay Fariisiyaajo noddunoodo lisaa on yi'ii dun, o wi'i e bernde makko: «Si tawno oo ko annabaajo, o andayno ko hombo woni oo debbo meemudo mo e ko honno on sifori, sabu oo ko junuubankeejo!»

⁴⁰ Lisaa yetti haala kan, wi'i: «Sim'uunu, no woodi ko mi haalanay-maa.»

On jaabii: «Maakee yo karamoko'en.»

⁴¹ O wi'i: «Goddo no jawlunoo yimbe dido. Gooto on no joganii mo *dinaruji teemedde jowi, oya on ko *dinaruji cappande jowi. ⁴² Bay ben hebaali ko yobitira mo, o yaafanii be didoo non ko be jawlili mo kon. Ko hombo e ben dido burata mo yidude?»

⁴³ Sim'uunu jaabii: «Haray ko burdo jamaande tiidunde on.»

Onsay lisaa wi'i mo: «A jaawirii no moyyiri.»

⁴⁴ O fewti e debbo on, o wi'i Sim'uunu: «A yi'ii oo debbo? An, mi naatii ka suudu maa, a okkoraali lan ndiyan ko mi sembora, kono oo doo bubbynirii koyde an den gondi mun din, o fittirii de sukundu makko ndun. ⁴⁵ A hirbanooki lan lunnidaa, kono kanko gila mi naati doo, himo lunnaade lan koyde den. ⁴⁶ A wadaali nebban ka hoore an, kono kanko o wadii angiri ka koyde an. ⁴⁷ Awa mi andinii ma, junuubaaji makko e duudude yaafaama, ko dun wadi si giggol makko ngol no tiidi. Kono mo yaafaama seeda, ko seeda yidata.»

⁴⁸ Onsay o wi'i debbo on: «Junuubaaji maa din yaafaama.»

⁴⁹ Onsay jaamidaynoobe e makko ben mijiji e berde mun: «Ko hombo woni oo neddo yaafotoodo hay junuubaaji?»

⁵⁰ Ontuma o wi'i debbo on: «Gomdinal maa ngal dandii ma. Yahu e hoore buttu.»

Fii Dowtunoobe Iisaa 6en

8¹ Bawto dun, Iisaa yahayno gila e saare hebi e saare, gila e hodo haa e kodolun wondude e *sahaabaabe makko 6en sappoo e cido, hara himo waajoo fejnina Kibaaru Moyyo *laamu Alla ngun.² Himo wondunoo kadi e rewbe goo jawnadaabe jinnaaji bondi e nabbeeli, wano Mariyama oo jammaado Mariyama Magaduuna, mo jinnaaji jeedidi yaltinaa e mun,³ e Yuuwanna on ko sonnaajo Kuusa oo mbatulaajo *Heroodu, e Suusanatu, e wobbe goo wallitoraynoobe be keyeeji mun.

Misal Yettaangal e Remoowo

(Mat. 13.1-23; Mrk. 4.1-20)

⁴Jamaa njano moobii, yimbe buy iwri e ca'e heewude, ari e makko. O wadani be ngal misal doo:⁵ «Ko remoowo yaltunoo sankugol awdi mun ndin. E nder ko o sankata kon, gabbe goo yani ka datal, feyyoobe 6en yaabi, colli din kadi modi de.

⁶Godde den yani e hoore fetere, no de fudirnoo, de yoori, bay de alaa e buubol.

⁷Godde goo kadi yani ka sooyoore, de fudidi e mayre, sooyoore nden modi de.

⁸Godde goo yani ka leydi moyyiri. De fudi, de rimi cawti di gabbe teemedere.» Wa fewndo ko o yewtaynoo dun, o ewnii, o wi'i: «Mo no mari noppo nanirdi yo nanu!»

⁹Onsay taalibaabe makko 6en landii mo ko ngal misal doo firi.¹⁰ O jaabii 6e: «Onon on yedaama andugol gundooji laamu Alla ngun. Kono beya luttube, dun wowlirante be mise, fii yo be ndaaru, hara be yi'ataa, yo be nanu, hara be faamataa.ⁿ

¹¹«E hino ko ngal misal firi: Awdi ndin ko daalol Alla ngol.¹² Nde awdi sankaandi ndin saami ka datal, dun no wa'i wa nde wobbe nani daalol ngol, kono Ibuliisa ara itta ngol e berde mabbe fii wota be gomdin sakko be dandee.¹³ Nde awdi

ⁿ8.10 Isa. 6.9-10

sankaandi ndin saami ka fetere, dun no wa'i wa nde wobbe nani daalol ngol, be jabira ngol weltaare. Kono be alaa dadi. Be gomdinay haa e saa'i, kono si be ndarndaama, be tertoo. ¹⁴Nde awdi sinkaandi ndin saami ka sooyoore, dun no wa'i wa nde wobbe nani daalol ngol, kono hara be modiraama anndeeji aduna e jawle aduna e faaleeji ngurndan aduna e nder yaadu mabbe ndun, be ronka rimude moyya. ¹⁵Nde awdi sinkaandi ndin saami ka leydi moyyiri, dun no wa'i wa nde wobbe naniri daaluyee on bernde laabunde moyyunde, jogitoo mara. Ko ben woni rimoobe e nder wakkilaare.

Misal Yettaangal e Lampu

(*Mrk. 4.21-25*)

¹⁶ «Hay gooto hubbintaa lampu buuma mo maa sorna mo e ley danki. Kono o jodzinay mo e kene fii no naatoobe ben yi'ira ndaygu ngun. ¹⁷Ko fii alaa ko suudii ko feenataa, kala gundoo ko sakkitora ko feenoygol. ¹⁸Awa wattanee yiila e no hedorton non, ko fii ko mardo beydantee, kono mo maraa on jabitante hay ko o sikki himo mari kon.»

Fii Beynguure Iisaa nden

(*Mat. 12.46-50; Mrk. 3.31-35*)

¹⁹ Yumma Iisaa e yumma-gootoobe makko ben ari, kono be waawaali tumbondirde e makko hakkee yimbe. ²⁰O humpitaa wonde: «Yumma mon e yumma-gootoobe mon ben no darii ka yaasi, hibe faalaa yiidude e mon.

²¹ Kono o jaabii be, o wi'i: «Yumma an e yumma-gootoobe an ben ko hedotoobe daaluyee Alla on, jinna mo.»

Fii no Iisaa Deeyiniri Waabiliire nden

(Mat. 8.23-27; Mrk. 4.35-41)

²²Nande goo Iisaa bakii e laakun wondude e taalibaabe mun 6en. O wi'i 6e:
«Lumbiten ka gada weendu.» Be yahi. ²³E nder ko 6e lumbata kon, Iisaa daanii.
Waabiliire tiidunde wondunde e hendu tippii ka weendu, laakun kun fuddii
heewude ndiyan, dun wonani 6e nawaare hulbiniinde.

²⁴Be ari, 6e findini mo, 6e wi'i: «Karamoko'en, Karamoko'en, en mulay woni!»
O immii, o tonjani hendu ndun e morloode ndiyan den, de deeyiti, onsay buttu
wadi. ²⁵Ontuma o wi'i 6e: «Ko honto gomdinal mon ngal woni?»

Be huli, 6e 7aldi, hibe wi'indira: «Ko hombo woni oo neddo yamiroowo hay
hendu ndun e ndiyan dan, dun doftoo mo?»

Fii no Iisaa Selliniri Jinnaado

(Mat. 8.28-34; Mrk. 5.1-20)

²⁶Be hewtoyi e ndii leydi bee Gadariyankoobe tiindondirndi e ngal diiwal Jaliilu.
²⁷Bay Iisaa jippike ka leydi, neddo jeyaado e nden saare mo jinnaaji buy nangi, ari
e makko. Tawi gila neebii o bornotaako conci, o naatataa e suudu, ko ka
hakkunde genaale o hodunoo. ²⁸No o yiirunoo Iisaa, o sonki, o yani e ley koyde
makko, o ewnii, himo wi'a: «Ko hondun faalanadaa lan an Iisaa *Biddo Alla Jom
Bural on? Mi torike ma wota a lettan!»²⁹Ngii jinnawii bonngii wi'i dun sabu ko
Iisaa yamiraynoo ngin yaltugol e oo neddo kon. Tawi ngin jinnawii nangayno mo
soono woo, o dumbee juude e koyde fii aynugol mo, kono o bonnayno den
jolokooje fow, onsay jinnawii ngin nawra mo ka wulaaji.

³⁰Onsay Iisaa landii mo: «Ko honno innetedaa?»
Tawde hari jinnaaji buy no e makko, o jaabii: «Ko Konu.»³¹Awa kadi hidî
jeejaynoo Iisaa fii wota o yamir di yahugol ka *gaygii ngin alaa kattudi ngin.

³²Tawi wuro kose moolanaango no ooraynoo ka falo. Onsay jinnaaji din jeeji Iisaa yo o accu di naata e din koseeji. O newnani di dun. ³³Jinnaaji din yalti e on neddo, di naati e nder din koseeji. Onsay koseeji din giddi ka falo, di unoyii ka weendu, di yoolii.

³⁴Bay ornaynoobe di ben yi'ii dun, be dogi, be fillitoyii dun ka saare e ka fulawaaji. ³⁵Onsay yimbe ben ari yi'ugol kon ko wadi. Be ari e Iisaa, be tawi on neddo mo jinnaaji din yalti e mun no joodii ka ley koyde Iisaa, himo bornii, himo wondi e hakkille timmude, be huli. ³⁶Yi'unoobe ko wadi kon fillitanii be no jinnanoodo on selliniraa. ³⁷Onsay jeyaabe e diiwal Gadariyankoobe ben fow torii mo yaltugol ka mabbe sabu kulol be hebi don ngol. Ontuma Iisaa bakii ka laakun yiltitii.

³⁸Onsay neddo mo jinnaaji din yaltinaa e mun on torii Iisaa wondugol e makko. Kono Iisaa yilti mo, o wi'i mo: ³⁹«Hootu ka mon, fillitoyodaa ko Alla wadan-maa kon.» Onsay o yahi, o ukkii ka saare, o fillitii kala ko Iisaa wadani mo kon.

Fii no Iisaa Wurnitiri Jiwo, O Sellini Debbo

(Mat. 9.18-26; Mrk. 5.21-43)

⁴⁰Bay Iisaa lumbitii, jamaa on jabbii mo, ko fii hari fow no sabbii mo. ⁴¹Tun oo hooreejo juulirde mabbe wi'eteedo Yaayirusu ari e makko. Onsay o yani e ley koyde Iisaa, o torii mo hewtugol ka suudu makko, ⁴²bay tawi jiwo makko bajjo mo wa duubi sappoo e didi no e daande mayde.

Wa fewndo kanko Iisaa o yahata ka oo neddo, tawi jamaa on no bittiri mo cende den fow. ⁴³Tawi kadi debbo no e nden nokkuure, hebii duubi sappoo e didi, himo soncaade. Awa kadi o ittii jawle makko fow o yobii nawndoobe ben, kono hay gooto e mabbe waawaali mo sellinde. ⁴⁴On debbo wontiri baawo Iisaa. No o meemirnoo kombol dolokke makko on, ko o soncotonoo kon tayi.

⁴⁵Onsay Iisaa wi'i: «Ko hombo meemimmi?»

Tun mo kala wi'i wonaa kajun. Onsay Petruusu wi'i: «Karamoko'en, jamaa on no hundi on, awa kadi hibe hibbii on!»

⁴⁶Kono Iisaa jaabii, o wi'i: «Goddoo meemii lan, ko fii mi andii wonde bawgal an ngal gollii goddun.»

⁴⁷Nde debbo on tawnoo ko o wadi kon pulfitike, o ari himo diwna, o yani e ley koyde Iisaa, o furniti yeeso jamaa on fow ko fii hondun o meemani mo e ko honno kadi o selliniraa don kisan. ⁴⁸Onsay Iisaa wi'i mo: «Jiwo an, gomdin maa ngal sellinii ma. Yahu e hoore buttu.»

⁴⁹Wa fewndo ko Iisaa yewtata dun, gorko jeyaado ka hooreejo juulirde nden ari, wi'i mo: «Jiwo maa on maayii. Hay tertidaa sonjugol oo karamokoojo.»

⁵⁰Kono bay Iisaa nanii dun, o wi'i hooreejo juulirde nden: «Wota a hulu, gomdin tun, jiwo maa on hisay.»

⁵¹Bay Iisaa hewtii ka hooreejo juulirde nden, o jabaano naatidude hay e gooto ka suudu si hinaa Petruusu e Yaaquuba e Yuuhanna wondude e yumma jiwo on e ben jiwo on. ⁵²Tawi fow no wulla fesa fii on jiwo. Onsay Iisaa wi'i: «Wota on wullu mo, ko fii o maayaali, o daani.»

⁵³Onsay be jali mo, ko fii hibe andi jiwo on maayii. ⁵⁴Onsay Iisaa nangi jungo jiwo on, o ewnii, o wi'i: «Jiwo, immo!»⁵⁵Tun wonkii jiwo on arti, o immii don kisan. Onsay Iisaa yamiri be okkorgol mo jaametee. ⁵⁶Kaawee hebi mawbe jiwo on. Kono o yamiri be wota be wowlan hay gooto kon ko wadi don.

Fii no Sahaabaabe ben Sappoo e Dido Nuliraa

(Mat. 10.2-20; Mrk. 6.7-13)

9¹O noddi be o subunoo ben sappoo e dido, o okki be bawgal e doole e hoore jinnaaji din fow e fii sellingol nabbeeli. ²O immini be waajoyagol fii *laamu Alla ngun e sellingol nawbe ben. ³O wi'i be: «Wota on yoobo hay huunde e nder yaadu

mon ndun, gila e tuggordu maa bonfo maa jaametee goo haa nabani e kaalisi. Awa kadi wota on yoobo dolokkaaji didi.»

⁴O wi'i be kadi: «Kala suudu ka naatoydon, weeree don haa tuma fokkitudon woo, ⁵e kala saare nde yimbe ben jabaali on e mun, nde hidon yalta don woo, honkee mbullaari teppe mon den fii yo dun wonan be seedee ella mabbe on.»⁶Onsay be yahi kodolun e kodolii, hibe waajoo fii Kibaaru Moyyo on e kadi hibe sellina hen fow jawbe ben.

Fii ḥalaw Heroodu on

(Mat. 14.1-12; Mrk. 6.14-16)

⁷Heroodu* lando diiwal Jaliilu ngal humpitii fii ko woni wadude kon, dun jiibi mo bernde, sabu hari wobbe no wi'a ko Yaayaa immintinaa e hakkunde maybe ben, ⁸wobbe ben no wi'a wondema ko Iiliya feeniti, wobbe goo no wi'a wondema ko goddo e annabaabe hibbe ben immitii. ⁹Kono Heroodu wi'i: «Mi tayiino daande Yaayaa nden, e hara ko hombo woni oo mo mi nanata fii mun nii?» Gila dun himo etoo no o yi'ira mo.

Fii no Iisaa Namminiri Yimbe Guluuje Njowo

(Mat. 14.13-21; Mrk. 6.30-44; Yhn. 6.1-14)

¹⁰Bay ben *sahaabaabe be o imminnoo hewtitii, be sifanii mo kanko Iisaa ko be wadoyi kon fow. Onsay o yaadi e mabbe haa e takko ndee saare Bayti-Sa'iida, be bakitii don. ¹¹No yimbe ben humpitornoo dun, be jokki mo. Onsay Iisaa tolni be, o yewti be fii laamu Alla ngun, o jawndi kadi ben hatonjinbe e jawndeede.

¹²Tawi nallal ngal woddike. Onsay sappoo e didoobe ben ari e makko, be wi'i mo: «Accitee non jamaa on, be yaha ka kodooli e ka fulawaaji kawtirdi e doo, be daboya ko be jaama e ka be waaloo, ko fii ko e nokkuure wuldinnde wonden doo.»

¹³ Onsay Iisaa wi'i ße: «Onon tigi okkoree ße ko ße jaama.»

Kono ße jaabii, ße wi'i: «Ko bireedijje jowi e liyßi didi pet men mari doo, si hinaa hara menen tigi men yahay men soodoya ko oo jamaa doo fow jaama!»¹⁴ Tawi worbe wonbe don ßen tun ko wa ße guluuje njowo.

Onsay Iisaa yamiri taalibaabe mun ßen, wi'i: «Joddiniree ße mojobe mojobe, mojobere kala cappande njowo.»¹⁵ Be joddiniri ße no o wi'iri ße non.¹⁶ Onsay Iisaa yetti bireedijje ßen jowi e liyßi din didi, o banti gite makko ßen, o fewti ka kammu, o du'ii. Ontuma o tayiti de, o woni e jonnugol taalibaabe makko ßen fii yo ßen hewtin jamaa on.¹⁷ Fow jaami haa haari. Be moobiti debeeje sappoo e didi kunte ko lutti.

Fii Qirritannde Petruusu nden

(Mat. 16.13-19; Mrk. 8.27-30)

¹⁸ Nande goo tawi Iisaa no wondi e taalibaabe mun ßen ka wirnii, himo toraade Alla. Ontuma o landii ße dundoo, o wi'i: «E wi'i jamaa on, ko hombo woni lan min?»

¹⁹ Be jaabii mo, ße wi'i: «Wobbe no wi'a ko onon woni Yaayaa lootaynoodo on, wobbe kadi no wi'a ko onon woni liliya, wobbe goo kadi no wi'a ko on annabaajo kiddo goo immintinaa.»

²⁰ Onsay o landii ße, o wi'i: «Onon non wi'udon ko hombo woni lan min?»

Petruusu jaabii mo, wi'i: «Ko onon woni *Almasiihu Alla on.»

²¹ Iisaa yamiri ße, tentini, wota ße wowlan dun hay gooto.²² O beyditi e dun, o wi'i: «Maa *Bii-Aaden on tampa fota, mawbe ßen e hooreebe *yottinoobe sadaka ßen e jannoobe fii Sariya on ßen fow wikkoo mo, o waree, o immintinoyee ka nalaande tammere.»

²³ Onsay o wi'i ɓe fow wonde: «Kala faalaado jokkude lan, yo o hayfintino, o yetta nande woo nande *leggal makko altindiraangal ngal,ⁿ o jokkammi. ²⁴ Kala faalaado dandude ngurndan mun, dan hayriray mo, kono kala non mo ngurndan mun hayrira sabu an min, haray ontigi dandoyay dan. ²⁵ E ko nafa hondun woodani neddo hebugol aduna on fow si o hayrintinike maa si o halkitike kanko tigi? ²⁶ Awa kadi, kala hersirdo lan, hersiri kongudi an din, Bii-Aaden on kadi hersiroyay mo tuma o ardoi e mangural makko ngal e mangural Baabaajo on wondude e malaa'ikaabe laabube ben. ²⁷ Mido wowlande on goonga, no woodi wobbe e mon onon wonbe doo ben, ɓe maayataa ado ɓe yi'ude laamu Alla ngun.»

Fii Waylannde MBAADI Iisaa ndin

(Mat. 17.1-8; Mrk. 9.2-8)

²⁸ Bay wa balde jeetati feyyii bawto yewtugol mo ɓe din kongudi, onsay o noddi Petruusu e Yuuhanna e Yaaquuba, ɓe yahi ka fello fii toragol Alla. ²⁹ Fewndo ko o torotoo, mbaadi yeeso makko ngon waylii, dolokke makko on wonti daneejo jalbudo. ³⁰ E nder dun, yimbe dido feejni no yewtida e makko, tawi ben-le ko Muusaa e Iiliya. ³¹ Ben no feenidi e annoora, hibe yewta fii yaadu makko sakkitordu ndun Yerusalem. ³² Tawi Petruusu e wondibbe mun ben no soyyaade, kono ɓe ɣonti, ɓe yi'i annoora Iisaa on e ben yimbe dido ɓe o wondunoo e mun. ³³ Fewndo ɓee yimbe dido seedata e Iisaa, Petruusu wi'i mo: «Karamoko'en, no moyyi ka wonen doo. Darnen togooji tati, onon wonndu, Muusaa wonndu, Iiliya kadi wonndu.» Tawi kanko Petruusu o andaa ko o woni wowlude.

³⁴ Wa fewndo ko o wowlata dun, duulere ari buumi ɓe. Ko nden duulere buumata ɓe, ɓe huli. ³⁵ Onsay hawa yalti ka duulere, no wi'a: «Oo doo ko Biddo an Subaado on. Heditee mol!»³⁶ Bay ngol ewol wadii, ɓe tawi ko Iisaa tun lutti don.

ⁿ9.23 «Yettugol leggal mun altindiraangal ngal» ko hebilagol jokkugol Iisaa haa maaya.

Taalibaabe ben mari dun fanki. Be fillitanaaki hay gooto kon ko be yi'i don e nder den balde don.

Fii no Iisaa Selliniri Paykun Jinnaakun

(Mat. 17.14-18; Mrk. 9.14-27)

³⁷ Bimbi nden jnande ko be jippotoo ka ley fello, jamaa moolanaado ari fottugol e Iisaa. ³⁸ Onsay gorko goo ewnii ka hakkunde jamaa ton, o wi'i: «Karamoko'en, mi torike on tenyinee oo biddo an, ko fii ko bajjo an on nii. ³⁹ Nde jinnawii ngin nangi mo woo, o sonkay, o iiroo, o yaltina ngurda. Ngii letta mo, awa kadi ko karahan ngii yaltirta e makko. ⁴⁰ Mi torike taalibaabe mon ben radagol ngii jinnawii, kono be waawaali.»

⁴¹ Iisaa jaabii, wi'i: «Onon ko on jamaanu boyliingu ngu gomdinaa. Ko haa honde tuma mi wodata e mon, mido mujjanoo on? Awa addu doo biddo maa on.»

⁴² Wa ko o bannata paykun kun, jinnawii ngin libi kun ka leydi, kun iirii. Kono Iisaa tojani ngii. Onsay o sellini paykun kun, o jonniti kun ben makkun. ⁴³ Fow ηaldī fii mangural Allaahu on.

Fii no Iisaa Hiitori fii Mayde mun nden

(Mat. 17.22-23; Mrk. 9.30-32)

Wa fewndo ko fow ηaldidi e ko o wadaynood kon kanko Iisaa, onsay o wi'i taalibaabe ben: ⁴⁴ «Onon heditee fota dii kongudi doo: Bii-Aaden on janfoyte, wattee e juude yimbe ben.» ⁴⁵ Kono hari taalibaabe ben alaa faamude din kongudi, sabu hari hidī wirnanii be fii wota be andu ko di firi. Awa kadi hari hibe huli landitagol mo di.

Fii Burdo Teddude on e Hakkunde Maßbe

(Mat. 18.1-5; Mrk. 9.33-37)

⁴⁶ Onsay yeddondiral wadi hakkunde mabbe fii andugol ko hombo e mabbe buri teddude. ⁴⁷ Nde tawnoo Iisaa kajun no andunoo din muijooji mabbe, o yetti

paykun, o joddini takko makko.⁴⁸ Onsay o wi'i ɓe: «Kala jabudo kun paykun e innde an, haray ko min o jabi. Awa kadi kala jabudo lan, haray ko Nuludo lan on o jabi. Ko fii ko burdo fandude on e mon woni teddudo.»

⁴⁹ Yuuhanna yetti haala kan, wi'i: «Karamoko'en, men yi'ii goddo no radoo jinnaaji e innde mo'on. Men tojani mo dun, bay o wondaa e amen fii jokkugol on.»

⁵⁰ Onsay Iisaa wi'i mo: «Wota on tojan mo dun. Ko fii kala mo wonaa gano mon, haray ko gido mon.»

Fii no Samariyankeeɓe ɓen Salornoo Tolnude Iisaa

⁵¹ Bay wonii balde de Iisaa ittetee ka aduna doo den hewtii, o fibi anniyyee yahugol Yerusalaam. ⁵² O immini wobbe ko hikkoo yeeso makko, ɓen yahi haa e hodo Samariyankeeɓe goo fii ebbindanagol mo don kanko Iisaa. ⁵³ Kono ɓen yimɓe jabaali mo tolnude, bay ko Yerusalaam o sutii. ⁵⁴ Bay ɓe yi'ii dun, Yaaquuba e Yuuhanna wi'i Iisaa: «Koohoojo amen, hidon faalaa yo men wi'u yo yiite ngen iwu ka kammu ara mula ɓee?» ⁵⁵ Onsay Iisaa fewti e maɓbe, feli ɓe fota. ⁵⁶ Ontuma ɓe yaari e hodo goo.

Fii ɓen Faalaabe Jokkude Iisaa

(Mat. 8.19-22)

⁵⁷ E nder ko ɓe yahata kon, goddo wi'i mo: «Mi jokkete kala ka yaarudaa.»

⁵⁸ Iisaa jaabii mo, wi'i: «Ndoni din no mari gayde mun, awa kadi colli din ka weeyo no mari jnakkajji mun, kono Bii-Aaden on kan alaa hay ka fowtina hoore mun nden.»

⁵⁹ Iisaa wi'i goddo goo: «Jokkan!»

On jaabii mo: «Koohoojo, newnanee lan taho, mi yaha mi wattinoya ben an en.»

⁶⁰ Kono Iisaa jaabii mo, wi'i: «Accu maybe ben wattina maybe mun ben, kono an yahaa fejnjinoyaa fii laamu Alla ngun.»

⁶¹ Goddo goo kadi wi'i mo: «Koohoojo, mi jokkay on, kono newnanee lan taho, mi yaha mi waynfoyoo beynguure an nden.»

⁶² Iisaa wi'i ondon kadi: «Kala fawudo jungo mun e hoore keri sarin, ontigi yeiyitii baawo, haray on nafataa laamu Alla ngun.»

Fii no Taalibaabe ben Cappande Njeedido e Dido Nuliraa

(Mat. 10.5-14)

10¹ Bay feyyii e dun, Koohoojo on toddii fahin taalibaabe cappande njeedido e dido. O imminiri be dido dido ko yaha adoyoo mo e ca'e den fow e kala nokkeeli di o rewoyta e mun. ² O wi'i be: «Baagol ngol no duudi, kono wa'oobe ben duudaa. Awa jooni, toree non Jom baagol ngol yo o addu wa'oobe ka baagol makko. ³ Jooni mido imminirde on wa baaloy e hakkunde caapaali, yahee. ⁴ Awa kadi wota on yoobo bonfohun kaalisi maa sasa maa pade goo, hara kadi on hiwraaki hay gooto ka hoore laawol. ⁵ Kala suudu ndu naatoton e mun, wi'ee taho: ‹Yo buttu wonu e nduu suudu!›⁶ Si bii-buttu no e nder ndun suudu, buttu mon on juuroto mo. Si ko liddu mun, on buttu wontanay on. ⁷ Tabitee e ndun suudu don, jaamon yaron ko be okkori on don woo, ko fii golloowo no handi e njoddi mun, hara on wadaali naata e nduu yalta e nduu.

⁸ «Kala saare nde naatudon e mun tolnadon, jaamee ko bannanadon kon.

⁹ Sellinon jawbe be tawdon don ben, wi'on be wonde *laamu Alla ngun badike be.

¹⁰ Kono kala saare nde naatudon e mun, be salii on tolnude, yahee ka fottirde mabbe, wi'on: ¹¹ ‹Men fidday e mon mbullaari saare mon nangundi men ndin e koyde! Kono andee tun wonde, laamu Alla ngun badike!›¹² Mi andinii on, jaawoore nden ko ndee saare *Saduma suretee hoynaneede edii nden saare don.

¹³ «Bone wonanii ndee saare Kuuraziin e ndee saare Bayti-Sa'iida! Ko fii si tawno dii kaawakeeji moyýí wadunoodi ka mon, ko non wadirnoo e dee ca'e Tiiri e Siduuna, harayno neebii ko jeyaabe e den ca'e bornii conci heynordi, be wujitii ndoondi fii hollugol wonde be tuubii. ¹⁴ Ko dun wadi, jnande jaawoore nden ko Tiiri e Siduuna buretee hoynaneede edii onon. ¹⁵ Onon non, bee be Kafernahuum, hidon sikka fii mon bantete haa ka aljanna? Oo'o, on bugete ka jahannama.

¹⁶ «Kala heditiido on onon bee taalibaabe an, haray ko min o heditii. Kala bugitiido on, haray ko min o bugitii. Awa-le kala bugitiido lan, haray ko Nuludo lan on o bugitii.»

¹⁷ Ben cappande njeedido e dido artidi e weltaare, be wi'i: «Koohoojo amen, hay jinnaaji din yankinanike men e innde mon!»

¹⁸ Onsay o wi'i be: «Mi yi'ayno Ibuliisa no iwa ka kammu yanira wa farnitere.

¹⁹ Awa mi okkii on bawgal tippugol e bolle den e jahe den e kala bawde gano on, hara hay fus hebaali on. ²⁰ Wota on weltor ko jinnaaji din yankinanii on kon. Kono weltoree ko inde mon den windaa ka kammuuli kon.»

Fii Weltaare Iisaa nden

(Mat. 11.25-27; 13.16-17)

²¹ Ko e on saa'i don tigi, Iisaa hebi weltaare fota immorde e *Ruuhu Seniido on, o wi'i: «Mi yettii ma yo Baaba, Jom leydi e kammu, fii koo ko wirnandaa dun ben faamube e bee gandidube, fejjinandaa dun bee faybe. Hiiyii, ko fii ko dun wonnoo yidi maa on yo Baaba.

²² «Awa, Baaba an wattii fow e juude an. Awa kadi hay gooto andaa ko hombo woni Biddo on si hinaa Baabaajo on, wano tawiri non kadi hay gooto andaa ko hombo woni Baabaajo on si hinaa Biddo on e on mo Biddo on faalaa mo fejjinande.»

²³ Onsay o fewtiti taalibaabe ben o wi'i ɓe e qunuutu: «Gite yi'ude ko yi'udon kon malii! ²⁴ Ko fii mi andinii on, annabaabe e lambe buy faalano yi'ude koo ko wondon yi'ude, kono be yi'aali. Be faalano kadi nanude koo ko wondon nanude, kono ɓe nanaali.»

Misal Yettaangal e Samariyankeejo Moyy়o on

²⁵ Onsay goddo e waawube fii Sariya ben immii landii mo fii ndarndagol mo, o wi'i mo: «Karamoko'en, ko hondun mi haani wadude fii yo mi hebu dan *ngurndan poomayankejan?»

²⁶ Onsay Iisaa wi'i mo: «Ko hondun windii ka defte Sariya? Ko honno faamirdaa dun?»

²⁷ O jaabii mo, o wi'i: «Yo a yidir Alla Joomiraado maa on bernde maa nden fow e wonkii maa kin fow e doole maa den fow e hakkil maa kin fow^y, yidiraa nokondo maa on wano yidirdaa hoore maa non.»^p

²⁸ Onsay Iisaa wi'i mo: «A jaaborii no moyyiri. Warru non, a hebay dan ngurndan.»

²⁹ Kono tawi on no faalaa hollude peewal mun ngal, o wi'i Iisaa: «Ko hombo non woni on nokondo an?»

³⁰ Iisaa jaabori mo nii, o wi'i: «Goddo no iwraynoo Yerusalaam, no yaha Yeerikoo. O hawrondiri e wuybe, ben boori mo, piyi mo haa moggo mayde, ɓe yahi, ɓe acci mo don. ³¹ Hawrondiri *yottinoowo sadaka no feyyaynoodon, o yi'i oo neddo, o takkii mo, o feyyi. ³² Fahin *Lewiyankeejo ari tawi mo don, on kadi yi'i mo, takkii mo, feyyi. ³³ Kono Samariyankeejo wondo e nder safaari mun, ari tawi mo, yurmaa mo. ³⁴ Onsay o badii, o juurani mo njaram e nebban ka barmeeji, o habbi. Onsay o wadii mo ka mbaddateeri makko, o nabi mo haa e suudu hobbe, o

^y10.27a Yajn. 6.5

^p10.27b Lew. 19.18

dankii mo.³⁵ Bimbi mun, o yetti *dinaruuji didi, o jonni jom suudu hobbe ndun, o wi'i mo: «Dankor mo dii doo. Kala ko fawoydaa e hoore dii doo, mi yobitoyte tuma mi rewtoyi.»»

³⁶ Ontuma Iisaa wi'i: «Ko hombo e bee doo tato woni nokondo oo mo bee wuybe yani e mun?»

³⁷ On waawudo fii Sariya jaabii, wi'i: «Ko yurmaado mo on.»

Onsay Iisaa wi'i mo: «Yahu an kadi warraa non.»

Fii no Mariyat e Mariyama Werniri Iisaa

³⁸ Fewndo Iisaa e taalibaabe mun ben wonnoo e hoore laawol, be naati don e hodo. Debbo wi'eteedo Mariyat werni be ka mun.³⁹ Tawi on no mari neene-gooto wi'eteedo Mariyama, on joodii e ley koyde Koohoojo on no heditoo kongudi makko din.⁴⁰ Tawi Mariyat kajun no jindidude e muraadi nder suudu din. Onsay o ari, o wi'i: «Koohoojo an, on kippataa fii ko oo neene-gooto an accidimmi e dee golle doo kon fow? Wi'anee lan mo yo o wallito lan!»

⁴¹ Koohoojo on jaabii mo, wi'i: «Mariyat, Mariyat! Hida maapii aani fii piiji duududi.⁴² Kono ko huunde wootere tun hitti. Mariyama kajun subike ko buri hittude kon, dun-le o jabitantaake dun.»

Fii no Taalibaabe ben Haani Tororde Alla

(Mat. 6.9-13, 7.7-11)

11¹Nande goo tawi Iisaa no toraade Alla nokku goo. Bay o gaynii toraade, goddo e taalibaabe makko ben wi'i mo: «Koohoojo, tindinee men no torortee wano Yaayaat tindinirnoo non taalibaabe mun ben.»

² Onsay o wi'i be: «Nde hidon toroo, on wi'iray nii:

«Baaba,

yo innde maa nden hormore,

yo laamu maa ngun feenu.

³ Okkor men nande woo naametee haanando men on.

⁴ Yaafanodaa men junuubaaji amen din,
wano menen kadi men woni yaaforande kala bonnudo men.
Wota a naadu men e jarrabuyee.»

⁵ O wi'i kadi: «Si goddo e mon aru e immaade tumbere jemma, yaha ka njaatigi mun, o findina mo, o wi'a mo: <Njaatigi, jawlan bireedijje tati, ⁶ ko fii mido hebi kodo ka jemma doo, mi alaa hay fus ko mi okkora mo.»

⁷ «Si on non mo o findinoyi wi'ii mo: <Mi torike ma wota a finnan, ko fii a taw mi falii baafal ngal, min e faybe an 6en men waalike. Mi waawataa immaade fewndo doo, mi jonne bireedi!» ⁸ Mi andinii on, hay si o immaaki, o jonnira mo sabu njaatigyaagal wongal hakkunde ma6be ngal, o jonniray mo kala ko o handi sabu ko on torotoodo habbitori angal hersa kon.

⁹ «Min-le mi wi'ii on: Toree, on okkorte. Dabbee, on hebay. Hoddee, on udditante. ¹⁰ Ko fii kala toriido okkorte, kala dabbedo hebay, awa kadi kala on hoddido udditante.

¹¹ «Ko hombo e mon, biddo mun torotoo dun bireedi, ontigi jonna mo hayre? Maa o toroo mo lingii, ontigi jonna mo mboddi? ¹² Maa o toroo mo woofonde, o jonna mo yaare? ¹³ Si tawii non hay onon bonbe 6en, hidon waawi wadande 6ibbe mon 6en piiji moyyi, haray ko haa honto Ben mon Wondo ka kammu on okkorta 6en toriibe mo *Ruuhu Seniido on!»

Fii no Iisaa Radori Jinnaaji din

(Mat. 12.22-30; Mrk. 3.22-27)

¹⁴ Nande goo Iisaa radii jinnawii mbobindinngii goddo. No ngii yaltirnoo e ontigi, o wowli, jamaa wonnoodo don on fow mugaa. ¹⁵ Wobbe e ma6be wi'i: «Ko e immorde e *Balzabuula lando jinnaaji din o woni radorde jinnaaji din!» ¹⁶ Wobbe goo kadi fii ndarndagol mo torii mo hollugol 6e maande iwrunde ka kammu.

¹⁷ Nde tawnoo himo andi din miijooji maâbbe, o wi'i: «Kala laamateeri liddondirndi, kayri tigi ndi caabay. Awa kadi si suudu liddondirii, ndu lancoto.

¹⁸ Onon hidon wi'a ko tippude e Balzabuula mi woni radorde jinnaaji din. Si tawii non Ibuliisa liddike hoore mun tigi, ko honno laamateeri makko ndin tabitirta?

¹⁹ Si tawii non wonii min ko tippude e Balzabuula mi radorta jinnaaji din, d'un haray onon 6en non ko tippude e hombo 6e radorta di? Ko dun wadi si kambe tigi 6e jaawoyay on. ²⁰ Kono si tawii ko tippude e bawgal Alla ngal mi woni radorde jinnaaji din, haray *laamu Alla ngun arii haa e mon.

²¹ «Nde neddo dolnudo jom aalaaji ayni galle mun woo, jawle mun den daday.

²² Kono si tawii burdo mo doole arii, yanii e makko, foolii mo, o jabitay din jogaaji di o hoolornoo, o sendita den jawle makko.

²³ «Kala mo aldaa e an, haray ko gano an, awa kadi kala mo wallataa lan moobitude, haray ko saakoowo.

²⁴ «Nde jinnawii yalti e neddo woo, ngii hammiray ka wulaa, hara hingii dabba nokkuure fowtorde. Si ngii tawii ngii hebaali, ngii wi'ay: ‹Yo mi yiltito ka suudu ka mi iwnoo don.›²⁵ Nde ngii hewtiti, ngii tawa ndun suudu fittaama labbinaama.

²⁶ Onsay ngii yahay, ngii dabboya jinnaaji jeedidi burdi ngii hunyude, di naata don, di hoda. Onsay sakkitorde on neddo buray aranun dun bonude.»

²⁷ Fewndo ko Iisaa yewtaynoo dun, debbo ewnii ka hakkunde jamaa ton, wi'i: «Maloore wonanii nduu reedu saawundu ma e din endi di muynudaa!»

²⁸ Kono Iisaa jaabii, wi'i: «Maloore wonanii kan 6en hedotoobe daaluyee Alla on, doftoo mo!»

Fii Maande Annabi Yuunusa nden

(Mat. 12.38-42)

²⁹ Nde tawnoo jamaa on no beydaade tun, onsay kanko Iisaa o wi'i: «Nguu jamaanu doo ko jamaanu bonngu, hingu dabba maande. Kono ngu jonnetaake

maande si hinaa sifa ndee nde Yuunusa.³⁰ Ko fii ko wano Yuunusa wonirannoo yimbe ndee saare *Niinawa maande non, ko wano non *Bii-Aaden on kadi woniranta nguu jamaanu doo maande.³¹ Nande jaawoore nden, nde yimbe nguu jamaanu doo no jaawee woo, onsay oo debbo laaminoodo ndii leydi hikkorndi ka sengo jaamo immoyto, jaawoya be sabu iwugol mo haa ka kattudi leyde, ara heditoo ngun faamu Sulaymaana, hara-le burdo Sulaymaana no doo.³² Awa kadi nande jaawoore nden, nde yimbe nguu jamaanu doo no jaawee woo, yimbe Niinawa 6en kadi immoyto, jaawoya be sabu ko be hedino waaju Yuunusa ngun, be tuubi, hara-le burdo Yuunusa no doo.»

Misal Yettaangal e Lampu

(Mat. 5.15, 6.22-23; Mrk. 4.21)

³³ «Hay gooto hubbintaa lampu suuda mo maa hippa mo e ley siyonwal, kono o waday mo e kene fii no naatoobe 6en yi'ira ndaygu ngun. ³⁴ Ko yiitere maa nden woni ndaygu bandu ndun. Si tawii yiitere maa nden no selli, haray bandu maa ndun fow no ndaygi. Si tawii non yiitere nden no pawi, haray bandu maa ndun no e nder niwre. ³⁵ Reenee wota ndaygu wongu e mon ngun wontan on niwre. ³⁶ Si tawii bandu mon ndun no ndaygi, hara teral mon hay gootal alaa ka niwre, dun haray bandu mon ndun fow no ndaygiri wa nde ndaygu lampu jalbi e mon.»

Fii no Iisaa Hajori Fariisiyaabe 6en

(Mat. 23.1-36; Mrk. 12.38-40)

³⁷ Wa fewndo ko Iisaa yewtaynoo dun, *Fariisiyaajo goo torii mo yo be yaadu ka makko, be hirtodoya. Onsay o naati, o joodi fii jaamugol. ³⁸ Kono Fariisiyaajo on yaldii ko Iisaa toolii fii jaamugol kon soodaaki. ³⁹ Onsay Koohoojo on wi'i mo: «Onon bee Fariisiyaabe, ko baawo miranji din tun labbinton, hara hidon heewi miile e bonki. ⁴⁰ Onon ko on faada-hakkilbe, hara hinaa Tagudo baawo on tagi

nder on kadi? ⁴¹ Okkoree waasube ben ko woni ka nder kon, onsay ko heddi kon fow laabanay on.

⁴² «Kono bone wonanii on, onon bee Fariisiyaabe, bay hidon ittana naana e suukooran e kala tutateeriji wondi e naakoo farilla, hara hidon welsindanii peewal ngal Alla yedata ngal e giggol makko ngol. Hara-le ko dun haanunodon jokkude, tawa kadi on welsindaaki e ko heddi kon.

⁴³ «Bone wonanii on, ononbee Fariisiyaabe, bay hidon yidi saffawol aranol ngol ka juulirde e hiwreede ka fottirde.

⁴⁴ Bone wonanii on, bay hidon wa'i wa genaale de aldaa e maande, de goddo rewata e mun hara andaali!»^q

⁴⁵ Onsay goddo e hakkunde waawube fii Sariya ben yetti haala kan, wi'i mo: «Karamoko'en, si on maakirii nii, haray on aybinii men menen kadi!»

⁴⁶ Ontuma Iisaa jaabii mo, wi'i: «Bone wonanii on onon kadi bee waawube fii Sariya, bay hidon fawa yimbe ben dolle de be waawataa nabude, hara onon on fopportaa dun hay hoore hondu fii wallugol be.

⁴⁷ «Bone wonanii on, bay hidon maha maandina genaale annabaabe ben, hara-le ko baabiraabe mon ben sahinbini be. ⁴⁸ Dun no seedintini wonde hidon newni den kuude ben baabiraabe mon, bay ben sahinbiniino annabaabe ben, onon kadi hidon mahude maandina genaale mabbe den. ⁴⁹ Ko dun wadi si Alla, Jom faamu on, no daalunoo: «Mi nabanay be annabaabe e nulaabe, be wara wobbe e ben, be tampina beya ben», ⁵⁰ fii no nguu jamaanu doo yantirooyee yiyan annabaabe hibbanoodan dan gila ka fuddoode aduna, ⁵¹ dun ko gila e yiyan Haabiila dan haa addani e yiyan Zakariyaa dan, on waranoodo hakkunde *layyorde nden e *juulirde mawnde nden. Mi andinii on, pellet nguu jamaanu doo yantoyte fii dun.

^q11.44 Tippude e Sariya Muusa on, si goddo meemi furee maa o rewii e yenaande, haray o wonii harmudo. Lew. 21.11, Ada. 19.11

⁵² «Bone wonanii on, onon bee waawube fii Sariya, bay on suudii saabiwal gandal ngal, on naataali, awa kadi on jabaali faalanoobe naatude ben naata!»

⁵³ Bay o yaltii don, jannoobe fii Sariya on ben wondude e Fariisiyaabe ben fuddii mo monanaade, landoo mo lande duudude, ⁵⁴ wadana mo pirci, fii tun no be nangira mo immorde e kongudi makko din.

Fii Hajannde e Waaju

(Mat. 10.26-28)

12¹ Wa fewndo onsay, tawi yimbe guluuje guluuje moobondirii haa hibe yaabindira. Onsay Iisaa attii wi'i taalibaabe mun ben: «Reenee e lewen *Fariisiyaabe ben, dun ko faasiqankaaku ngun. ² Alaa ko suudii ko feenataa, awa kadi alaa gundoo mo andotaako. ³ Ko dun wadi, kala ko wowludon ka niwre feenay nalorma teddan, e kala ko sowndidion ka cuudi ewnorte ka warnakke.

⁴ «Mi andinii on yo yibbe an, wota on hulu waroobe bandu ben, toonin dun alaa ko be waawi. ⁵ Mi hollay on On mo gasoton hulude: hulee on Mardo bawgal warugol bugoo ka jahannama nde wari. Mi andinii on, ko on Mardo bawgal wadugol dun haanudon hulude. ⁶ Hinaa seresereeji jowi no yeeyee tammaaji didi? Kono Allaahu on kajun yejjitaa hay gootun e majji. ⁷ Hay cukuli ko'e mon den fow no limaa. Wota on hulu, ko fii hidon buri seresereeji buy hittude ka Alla.

⁸ «Mi andinii on, kala qirritiido fii an yeeso yimbe ben, *Bii-Aaden on kadi qirrito fii makko yeeso malaa'ikaabe Alla ben. ⁹ Kono kala yeddudo fii an yeeso yimbe ben, fii ontigi yeddyote e yeeso malaa'ikaabe Alla ben. ¹⁰ Kala wowludo Bii-Aaden on ko boni, no ara ka yaafanee. Kono kala hoynudo *Ruuhu Seniido on yaafantaake.

¹¹ «Tuma noddadon ka juulirde e yeeso mawbe ben e laamiibe ben, wota on jiboyo ko jaabodon maa ko wi'on. ¹² Ko fii don kisan Ruuhu Seniido on tigi longinay on ko gasoton yewtude kon.»

Fii Galo Faada-Hakkiljo

¹³ Goddo e hakkunde on jamaa wi'i Iisaa: «Karamoko'en, maakanee ben-gooto an on yo men sendodu ndondi amen ndin.»

¹⁴ O jaabii on neddo, o wi'i: «Ko hombo wadimmi jaawoowo maa sendanoowo on?»¹⁵ O watti e dun: «Reenee wattanon yiila e kala miile, ko fii ko aaden aldi woo, ngurndan makko dan hinaa e dun humii.»

¹⁶ Onsay o wadani be ngal misal doo, o wi'i: «No woodunoo neddo aldudo mo toore leydi mun moyyiri dun fota. ¹⁷ Tawi on neddo no mijotonoo, wi'a: <Ko honno mi wadata, ko fii mi alaa ka mi wada ngal cojal an?>¹⁸ O wi'itii: <E hino ko mi wadata kon: Mi lancay tumusuuje an den, mi moyyina burde de njandude ka mi loowa nende an den e piiji an din fow. ¹⁹ Jooni yo wonkii an, bay mido mari jawle buy ko yonatammi e nder duubi buy, yo mi fowto, mi jaama, mi yara, mi weltoo!>

²⁰ «Kono Allaahu on wi'i mo: <Ko an yo faada-hakkiljo, e nder oo jemma doo tigi a yantete wonkii maa kin. E hara koo ko faandidaa, ko hombo dun wontanta?>

²¹ «Awa ko nii woniranta kala on moobudo jawle e baawo aldangol Alla.»

Fii Hakkunde Anndeiji e Keyeeji

(Mat. 6.25-34)

²² Onsay Iisaa wi'i taalibaabe mun ben: «Ko dun wadi si mi wi'ay on wonde, wota on aanu fii ko jaamon e nder ngurndan mon dan maa fii ko bornon balli mon din.

²³ Ko fii ngurndan no buri neema, awa kadi bandu no buri koltu. ²⁴ Ndaaree kayakayaaji din: di sankataa, di wa'ataa, di alaa tumusuuje e caagaaje, kono Allaahu on no wurni di, hara-le hidon buri colli din hittude. ²⁵ Ko hombo e mon e nder annde mun waawataa beydude ngurndan mun dan beru sogonal? ²⁶ Si tawii non on waawataa hay ko buri lo'ude kon, haray ko hondun aananton fii ko lutti kon?

²⁷ «Ndaaree no dii piindiji fudirta njanda, hara-le dii gollataa, di sajnataa. Kono non mi andinii on, hay Sulaymaana e nder darja mun on fow holtiraali hay wa wootiri e majji. ²⁸ Si tawii non Allaahu on no holtinirde non hay hudo wonuko hande ka ngesa kon, bugoyteeko jango ka yiite kon, hara o ronkay wadande on ko buri dun, onon bee fanda-gomdinalbe? ²⁹ Onon non wota on yango fii ko jaamon maa ko yaron, wota fii dun maapin on. ³⁰ Ko fii dun fow ko be gomdinaa ka aduna ben dabbata dun. Kono Ben mon Wondo ka kammu on no andi hidon handi e dun. ³¹ Kono dabbree tun laamu makko ngun, din piiji fow beydanoyte on.

³² «Ko onon yo wuro tosooko, wota on hulu fus, sabu Ben mon Wondo ka kammu on tawii no wela mo ka o yeda on laamu ngun. ³³ Yeeyee ko jeydon kon, okkoron miskinbe ben, moyyinee bonfooji di hiddataa, dun wonanay on keyee mo lannataa ka kammuli, don mooyataa, awa kadi ngujjo meemataa. ³⁴ Ko fii ko ka keyee mon on woni woo, bernde mon nden wonata.»

Fii Reenugol e dow Hebulaare

³⁵ «Wonee hebuliibe,^r hara lampuubi mon din no hubbi. ³⁶ Wa'on wa nde jiyaado tijjii jom mun, hara ko yahudo peera, hara no on hewtitiri hoddi, o udditanay mo. ³⁷ Ben jiyaabe malii nde jom mabbe ari tawi hibe aynude. Ka haqiiqa mi andinii on, jom ben daditoto, o bannana be ko be jaama. ³⁸ Ben jiyaabe be jom mun tawi no ayna tumbere jemma maa ka tatabal jemma, haray ben malii. ³⁹ Ko fii andee fota, si tawno jom galle no andunoo nde ngujjo on araynoo wujjugol, haray o accataano galle makko den fusee. ⁴⁰ Awa onon kadi hebilee, ko fii Bii-Aaden on aroyay e saa'i nde on sogitaaki.»

^r12.35 Maa: «daditiibe».

Fii Jiyaado Holniido e Jiyaado Bondo

(Mat. 24.45-51)

⁴¹ Onsay Petruusu wi'i mo kanko Iisaa: «Koohoojo amen, hara ngal misal doo ko fii amen tun kaa ko fii yimbe ben fow?»

⁴² Koohoojo on jaabii mo, wi'i: «Hara ko golloowo hombo reeniido holniido woni ko jom mun halfinta neemingol kurkaadi mun din e saa'i haanudo? ⁴³ Maloore wonanii on jiyaado mo jom mun ari tawi no jokkiri non. ⁴⁴ Ka haqiiqa mi andinii on, o halfinay mo jawle makko den fow. ⁴⁵ Kono si on jiyaado wi'itike: ‹Jom an neebii araali›, onsay, o nangana tilfugol kurkaaduube ben worbe e rewbe e jaamugol yara haa mandila, ⁴⁶ jom on jiyaado aray nde on jiyaado sabbaaki mo e saa'i mo o sogitaaki, o letta mo lette sattude, o wada mo ka be gomdinaa ben wadetee ton.

⁴⁷ «Jiyaado andudo faaleeji jom mun din, kono o ebbindaaki, maa o wadaali faaleeji jom makko din, o piyete piggal duudungal. ⁴⁸ Kono si tawii non ontigi andaa faale jom mun on, o wadii kuude fodduude e donkineede, o foccete ko hawri. On okkoraado ko duudi yantete ko duudi, awa kadi on halfinaado ko duudi landitoyte ko burti.»

Fii Liddondiral

(Mat. 10.34-36)

⁴⁹ «Mido ari bugagol yiite e oo aduna, mi faalete hara nge hubbii! ⁵⁰ Kono no woodi loyegol ngol mi loyoytee, e maanaa dun ko tampere, doo yo dun sollitanan, haray mido sonjii. ⁵¹ E hara on sikku ko addugol buttu e oo aduna mi arani? Oo'o, hinaa dun, kono ko liddondiral mi addi. ⁵² Ko fii gila jooni njowo wondube e nder suudu be woncondiray, tato liddondiray e beya dido, beya dido kadi liddondira e beya tato. ⁵³ Baaba liddondiray e biddo, biddo liddondira e baaba, neene

liddondira e jiwo mun, jiwo kadi liddondira e neene mun, debbo liddondira e esiraawo mun jiwo, jiwo on kadi liddondira e esiraawo mun debbo.»

Fii Faamugol Firo Saa'iiji

(Mat. 16.2-3)

⁵⁴ Iisaa wi'i kadi jamaa on: «No yiirudon duulere no immori ka hirnaange, on wi'ay kisan <ndiyen dan aray>, dun wonira non. ⁵⁵ Awa kadi no yiirudon hendi ndun iwrii sengo jaamo woo, on wi'ay <nguleendi ndin arii>, dun kadi wada. ⁵⁶ Ko onon yo faasiqiibe, on waawii faamude fii ko feeji ka leydi kon e ko feeji ka kammu kon. Ko fii hondun non on waawaali andude oo saa'i fewndiido doo?

⁵⁷ «Hara ko fii hondun onon on waawataa faamande hoore mon ko feewi kon?

⁵⁸ Nde an e mo habidudaa hidon yaha ka yeesoojo on woo, wadu feere no faamondiriron ka laawol, fii wota o watte e juude jaawoowo on, on jaawoowo kadi watte e juude aynoobe kasong, ben sokoye. ⁵⁹ Mi andinii ma, a yaltataa don fannamaa a yobaali mbuuudu sakkitoro on.»

Ewol Tuubuubuyee

13 ¹Ko fewndo onsay, wobbe ari fillitanii Iisaa fii bee be Jaliilu be Pilaatu warnoo fewndo be hirsata daabeeji fii ittugol sadakaaji mabbe. ²O jaabii be kanko Iisaa, o wi'i: «Hara on sikku ben be Jaliilu no buri Jaliiluyankoobe ben fow junuubu bay be lettorii non? ³Min mi wi'ay on - oo'o! Kono si on tuubaali onon kadi, on fow on re'ay. ⁴Kaa hara on sikku bee sappoo e njeetato, be nduu suudu aynirdu ka maadi Siluwaama yani e mun wari, no buri bee be Yerusalaam luttuube fow bakkatu?

⁵ Min mi wi'ay on - oo'o! Kono si on tuubaali onon kadi, on fow on re'ay.»

⁶Onsay o wadani be ngal misal doo: «Tawi goddo no marnoo yibbehi ka tutateeri mun. O ari dabbugol bibbe e makki, o hebaali. ⁷Onsay o wi'i gollanoowo

mo on ka tutateeri: ‹Hebii nii duubi tati mido arude däbbugol bïbïe e ngal leggal, mi hebaali. Hara ko nafa hondun ngal wonani doo? Jooni soppu ngal!›

⁸ «Kono golloowo on jaabii mo, wi'i: ‹Jom an, accee ngal doo ndee hitaande doo. Doo e dun mi jasay binde maggal on fow mi wadana ngal jolu. ⁹ No gasa ka ngal rima ko arata. Si ko liddu mun, onsay on soppoyay ngal.›»

Fii no Debbo Jukkunnaajo on Selliniraa e Aseweere

¹⁰ Tawi jande goo Iisaa no jannaynoo e juulirde goo e *jalaande fowteteende nden, dun ko asewe. ¹¹ Tawi no don debbo mo jinnawii jukkini hebii duubi sappoo e jeetati, himo turii, o waawataano bantaade few. ¹² Bay Iisaa yi'ii mo, o noddi mo, o wi'i: «Debbo, a sendaama e jukkere maa nden!»¹³ Onsay Iisaa *fawi juude mun den e makko. Don kisan debbo on feewi e darnde, o manti Allaahu on.

¹⁴ Kono yeesoojo juulirde nden seytini kon ko Iisaa jawndi jande asewe, o wi'i jamaa on: «No woodi balde jeegoo gaseteede golleede e mun. Aree jawndedon e den balde don, hara hinaa e jalaande asewe!»

¹⁵ Koohoojo on jaabii mo, wi'i: «Ko onon yo faasiqiibe! Hinaa mo kala e mo'on yaltinay nagge mun maa mbabba mun ka dingiraa mun jande asewe, naba yarnoya? ¹⁶ Hara oo debbo iwdi Ibraahiima mo Ibiliisa habbi gila duubi sappoo e jeetati, haanaa ka o firtanee din kabbi jande jalaande fowteteende nden?»

¹⁷ Bay o yewtirii non, dun hersini aybe makko ben fow, kono jamaa luttudo on weltori dii piiji hittudi di o wadaynnoo.

Mise Yettaade e Abbere Bene e Lewen

(Mat. 13.31-33; Mrk. 4.30-32)

¹⁸ O wi'i fahin: «Hara ko hondun *laamu Alla ngun nandi, maa ko hondun mi ebbindirta e maggu? ¹⁹ Hingu wa'i wa abbere bene nde goddo yetti, bugii ka

suntuure mun. Nden fudi, wonti leggal ngal colli din ka weeyo arata hoda e caldi mun.»

²⁰O wi'i kadi: «E ko hondun mi ebbindirta e laamu Alla ngun? ²¹Hingu wa'i wa lewen mo debbo yetti, jillindiri e sariyaare tati condì farin, o piya dun, on lewen wona sabu dun fow yura.»

Yewtere fii Damun Tosokun

(Mat. 7.13-14)

²²Ko Iisaa yahaynoo Yerusalaam, o rewayno kodolun e kodolii hara himo waajoo. ²³Goddo goo landii mo, wi'i: «Koohoojo, hara ko yimbe seedaabe tun dandoytee?»

Onsay o wi'i be: ²⁴«Etee no naatiron ka dambugal faadungal, ko fii mi andinii on, buy dabboyay no naatira don, kono be waawoytaa. ²⁵Nde jom galle den immii ombi baafal ngal woo, hara hidon ka yaasi, onsay on fuddoto honkande mo baafal ngal, wi'a: «Koohoojo, udditanee men!» O jaaboyto on, o wi'a: «Min mi andaa ko on be honto!»

²⁶«Wi'on kadi: «Men jaamuno men yaridi e mon, awa kadi on waajotono ka date amen.»²⁷O jaaboo on kadi, o wi'a: «Min mi andaa ko on be honto. Onon bee wadaynoobe ko boylii fow, pottitee lan!»

²⁸«Tuma yi'udon Ibraahiima e Issaaqa e Yaaquuba e beya annabaabe heddiibe fow ka nder laamateeri Alla, tawa onon ko on bugoyteebe ka yaasi, ka wullaandu e ɻyatindiro ɻiiye woni ton. ²⁹Iwroyte funnaange e hirnaange, nano e jaamo, be nafodoya ka laamateeri Alla. ³⁰Awa andee wonde, no woodi ɻaawoobe wontiroyaybe yeeso, wano tawiri non kadi no woodi yeesoobe wontiroyaybe ɻaawo.»

Fii no Iisaa Aanirani Yerusalaam

(Mat. 23.37-39)

³¹ Ko e on saa'i don *Fariisiyaabe goo ari wi'i mo kanko Iisaa: «Yahu iwaa doo, ko fii *Heroodu no faalaa sahinbinde ma!»

³² O wi'i ɓe: «Yahee hollon ndun saafaandu: Mido radaade jinnaaji din, mi sellina nawbe ben hande e jango, ka nalaande tammere haray timmanii lan. ³³ Kono bee mi seppa hande e jango e faddi-jango, ko fii haanaa ka annabaajo waree ko wonaa Yerusalaam.

³⁴ «Ee Yerusalaam! Ee Yerusalaam! Ko an yo saare sahinbinoore annabaabe, wariroore nellaabe e mun kaaye! Ko haa honto mi faalanoo moobude ɓee fayɓe maa wano gertogal moobirta coppi e ley gabitti mun, e hin-le on jabaali dun!

³⁵ Awa nokkuure mon nden eggaama. Kono mi andinii on, on yiitataa lan haa nande wi'oyton: ‹Yo barki wonan oo wondo arude e innde Joomiraado on!›»^s

Fii no Iisaa Nawndiri Nawnudo Goo

14 ¹E *aseweere goo, dun ko *nalaande fowteteende nden, Iisaa naati e suudu hooreejo Fariisiyaabe ben fii nafagol, tawi ben Fariisiyaabe no tenyina mo. ²Tawi aaden buutudo no yeeso makko don. ³Onsay Iisaa landii waawube fii Sariya ben e Fariisiyaabe ben, o wi'i: «Hara no dagii ka jawndee e aseweere kaa dagaaki?»⁴Kono ɓe fow ɓe dey়ি. Onsay o yetti on jawdo, o sellini, o acciti mo, on yahi.

⁵ Onsay o wi'i ɓe: «Ko hombo e mon, si biddo mun maa nagge mun aru e yanude e nder woynu, salotoo nge yaw nude maa yawna mo don kisan fii nden jande ko asewe?»⁶Laatii ɓe waawaali jaabaade hay huunde e dun.

^s13.35 Zab. 118.26

Fii no Saatinirtee

⁷ Bay o yi'ii no ben saatinanoobe suboraynoo ndaddule yeesooje ñen, o wadani ñe ngal misal doo, o wi'i ñe: ⁸ «Si on aru e saatineede e peera, wota on wonu ka ndaddule yeesooje fii hita taw burdo on hittude no saatinaa don ⁹haa saatindo on on ara wi'a on: <Accanee oo doo ndaddudi ndin.> Onsay on hersay ruttagol ka ndaddudi baawoori. ¹⁰Kono tuma saatinadon woo, wontiree baawo fii tuma nde saatindo on on ari woo, yo o wi'u on: <Gido an, aru wonaa yeeso gaa.> Onsay dun wonanay on teddungal e tawnde ben ñe saatindinadon fow. ¹¹Ko fii kala mawnintiniido jippinoyte, awa kadi kala jippindo hoore mun mawninoyte.»

¹² Onsay kanko Iisaa o wi'i saatindo mo on: «Nde hida soyýína maa hirtina woo, wota a saatin yiibbe maa ben maa neene-gootoobe maa ben maa musibbe maa ben maa kawtalbe maa aldube ben, fii wota kambe kadi ñe saatine ñande goo, dun wonane njoddi. ¹³Kono nde wadataa caatal woo, saatin miskinbe ben e jukkunnaabe ben, e maanaa boofooibe ben e bumbe ben. ¹⁴Dun a wonoyay malaado, ko fii ben alaa ko yobitire, a yobitoyte ñande ummutal feewube ben.»

Misal Yettaangal e Saatinanoobe fii Nafagol

(Mat. 22.1-10)

¹⁵ Bay godðo e ñe o nafodaynoo ben nanii din kongudi makko kanko Iisaa, o wi'i mo: «Maloore wonanoyay on nafoytoodo ka *laamateeri Alla!»

¹⁶ Onsay Iisaa jaabii mo, wi'i: «Nande goo godðo waduno caatal moolanaangal, o saatini yimbe buy. ¹⁷Bay nafagol ngol fewndike, o nuli kurkaadu makko ndun yo on yahu wi'a ñe o saatinnoo ben yo ben aru, ko fii hebulaama.

¹⁸ «Kono ñe fow ñe kuylitidi. Arano on e mabbe wi'i ndun kurkaadu: <Mido soodi ngesa, bee mi yaha mi ndaaroya mba. Mi torike mo yo o yaafø lan.>¹⁹ Godðo on wi'i: <Mido soodi kalali sappo, mido yahude mi lasindoo ñi, mi torike mo yo o yaafø lan.>²⁰ Godðo goo kadi wi'i: <Mido jombi neebaali, ko dun hadata mi yaha.»

²¹ «Bay kurkaadu ndun hewtitii, o yottintini e jom makko ko o nulaa kon fow. Onsay jom galle on tikki, o wi'i ndun kurkaadu makko: <Yahu kisan e date den fow, njane e tosooke, addanoyaa mi miskinbe ben e jukkunnaabe ben e bumbe ben e boofoobe ben fow.»

²² «Kurkaadu ndun wi'i: <Jom an, ko yamirdon kon wadaama, kono haa jooni ka joodee no lutti.»

²³ «Onsay jom galle den wi'i kurkaadu ndun: <Yahu haa ka fulawaa, takkodaa kowle den fow, rewaa e datoy koy fow, etodaa no yimbe ben arda fii no ka an heewira. ²⁴ Ko fii mi andinii on, hay gooto e bee be mi saatinnoo aranun mettotaako oo nafakka an!»»

Fii no Iisaa Haanaa Jokkireede

(Mat. 10.37-38)

²⁵ Tawi jamaa moolanaado no jokkondirnoo e Iisaa. O fewtiti be, o wi'i: ²⁶ «Si goddo arii e an, hara o woniraa selugol ben makko e yumma makko e beyngu makko e bibbe makko ben e neene-gootoobe makko ben worbe e rewbe haa nabani wonkii makko kin tigi, haray ondon waawataa wonude taalibaajo an.

²⁷ Awa kadi kala mo yettaali *leggal mun altindiraangal ngal jokkimmi, haray ontigi waawataa wonude taalibaajo an.^t

²⁸ «Hara ko hombo e mon si no faalaa darnude koore, ronkata joodaade taho, taskoo fii ko o ebbi kon si ko ko yonata? ²⁹ Kulol wota ootigi fuddo ronka gaynude, fii wota yi'ube mo e dun ben fow jalu mo, ³⁰ wi'a: <Oo neddo fuddino darnude, kono o waawaali lannitaade!>

³¹ «Maa hara ko lando hombo fokkitanta habidoygol e lando goo mo konu mun woni embere yimbe guluuje noogayo, hara kanko ngu makko ngun ko embere

^t14.27 «Yettugol leggal mun altindiraangal ngal» ko hebilagol jokkugol Iisaa haa maaya.

yimbe guluuje sappo, ronkata joodaade taho, taskoo si o heboyay kutu mabbe?

³² Si o tawii non o heboytaa kutu mabbe bay oya no wodditii mo taho, o nelay e on fii yo on wadan mo sartiji no buttu on tabitira. ³³ Ko dun wadi, kala e mon mo woniraa seedugol e ko o jeyi kon, haray gasataa wonde taalibaajo an.

³⁴ «Landan ko huunde moyere, kono si dakamme majjan on iwii, haray ko honno dakamme majjan on wattirtee? ³⁵ Haray dan alaa nafa ka leydi maa ka nolu, ko hawkoyteedan ka yaasi.

«Mo no mari noppi nanirdi yo nanu!»

Misal Yettaangal e Baalii Majjungii

(Mat. 18.12-14)

15¹ Yantoobe sagalle ben fow wondude e junuubanke'en no badotonoo Iisaa fii hedagol mo. ² Fariisiyaabe* ben e jannoobe fii Sariya on no yunaynoo hakkunde mabbe, wi'a: «Oo doo kajun bannitay junuubanke'en, jaamida e mabbe!»

³ Onsay kanko Iisaa o wadani ben ngal misal doo, o wi'i: ⁴ «Ko hombo e mon si no mari baali teemedere, gootii e din majja, ronkata accude cappande jeenay e jeenayji din ka wulaa, yaha daabitoya majjungii ngin haa nde o yiitoyi ngii woo?

⁵ Nde o yiitoyi ngii, o wakkoo ngii e hoore weltaare. ⁶ Nde o hewtiti ka makko, o nodditay yibbe makko ben e kawtalbe makko ben, o wi'a be: «Weltodee e an, ko fii mi yiitii baalii an majjunoongii ngin!»⁷ Mi andinii on, ko wano non kadi weltaare burirta woodude ka kammu sabu junuubankeeo gooto tuubudo, edii feewube cappande njeenayo e njeenayo be tuubuubuyee fawaaki dun.»

Misal Yettaangal e Tammaaru Majjundu

⁸ «Maa ko debbo hombo mardo tammaaji sappo, si wooturu e din majjirii mo, ronkata hubbude lampu, fitta suudu mun ndun, daabitira hakkil haa nde o yiiti ndu woo? ⁹ Nde o yiiti ndu, o nodditay yibbe makko ben wondude e kawtalbe

makko ben, o wi'a 6e: «Weltodee e an, ko fii mi yiitii tammaaru an majjunoondun!»¹⁰ Mi andinii on, ko wano non kadi malaa'ikaabe Alla ben weltorta tuma nde junuubankeejo gooto tuubi.»

Misal Yettaangal e Biddo Funsoowo

¹¹ O wi'i kadi: «Goddo no marnoo 6ibbe dido. ¹² Toolaajo makko on wi'i mo: «Baaba an, jonnee lan gebal an ngal mi haani hendoyaade ngal ka jawdi mon.» Onsay ben mabbe sendani 6e jawdi mun ndin.

¹³ «Bay balde feyyii, toolaajo on moobi ko o jeyi kon fow, o yahi e leydi woddundi, o funsitoyi ton jawdi makko ndin fow e nder jiibaare. ¹⁴ Bay o lannii fewjande fow, heege tiidunge wadi e ndin leydi. Onsay o fuddaa 7akkireede. ¹⁵ O halfinoyii e goddo goo jeyaado e ndin leydi, on nabi mo ka gese mun fii ko aynana dun koseeji mun din. ¹⁶ Himo faaletenoo jaamude neteeje de koseeji din jaamaynoo den, kono hay gooto okkoraali mo.

¹⁷ «O luggini mijjo, o wi'i: «Ko golloobe njelo ben an mari jaamoobe haa luttina, hara min mido maaya doo heege! ¹⁸ Jooni non, mido yiltitaade ka ben an, mi wi'a 6e: Baaben, mi wadii junuubu ka Alla, mi hebii hakkee mon, ¹⁹ mi foddaa e noddeede biddo mon hande kadi. Jogoree lan wa golloowo mon.»

²⁰ «Onsay o yilitii ka ben makko. Bay o badike, ben makko haynii mo, yurmaa mo. Tun ben makko dogi, hirbii mo, lunnii. ²¹ Onsay on biddo makko wi'i mo: «Baaben, mi hebii junuubu ka Alla mi hebii hakkee mon, mi foddaa e noddeede biddo mon hande kadi!»

²² «Kono ben makko yamiri kurkaaduube mun 6en, o wi'i 6e: «Yahee tinna addanon mo kaftaane burdo fotude on bornon mo, wadanon mo hurundaare ka hondu e pade ko o wattoo.»²³ O wi'i 6e kadi: «Addoyee ga'un fayukun kun, hirson, naamen, weltoden. ²⁴ Ko fii hari oo biddo an doo ko maydo, kono jooni o wuunitii, hari kadi o majjii, kono jooni o yiitaama!» Onsay 6e woni e fijugol weltoda.

²⁵ «Dun hawrondiri afo makko on no ka ngesa. Bay on badike ka hodo fewndo ko o artata, o nani hito gimi e gami. ²⁶ Tun o noddi golloowo mabbe goo fii ko humpita mo kon ko woni wadude ka mabbe. ²⁷ On golloowo wi'i mo: <Minan maa hewtitii. Bay non o hewtitii e jam, ko sabu dun ben maa en hirsiri ga'un fayukun kun.›

²⁸ «On seytini kisan, o salii naatude. Onsay ben makko yalti jeeji mo fii yo o naatu. ²⁹ Kono o wi'i ben makko: <E hino, wadii nii duubi buy mido yanganaade on. Haa hande mi yeddaali on. Min-le hay nde wootere on okkaali lan hay be'un fii ko mi saatinira goreebe an ben. ³⁰ Kono bay oo biddo mon doo dekkudo ndii jawdi mon dekkidi ndi e wadoobe jinaa artii, ondon on hirsanii mo ga'un fayukun kun!›

³¹ «Ben makko wi'i mo: <An non boobo an, nande woo hidén wondi. Ko mi mari kon fow ko an jeyi. ³² Kono mi taw bee mi weltoo, mi wada velo-welo, bay hari oo mijjniraawo maa doo ko maydo, kono jooni o wuuritii, hari kadi o majjii, kono jooni o yiitaama.›»

Fii Mbatulaajo mo Feewaa

16 ¹ Isaa wi'i taalibaabe mun ben kadi: «No woodunoo aaden galoo mardo mbatulaajo, tawi on mbatulaajo makko no no'iraa funsugol jawdi on galoo. ² O noddi on mbatulaajo, o wi'i mo: <Ko hondun mi woni nanude e hoore maa? Jittanan no wondaa gollirde, ko fii a waawataa wonude mbatulaajo an hande kadi.›

³ «Onsay mbatulaajo on wi'itii: <Hara ko hondun mi wadata jooni, bay jom an no ittude lan wonugol mbatulaajo makko? E hin-le mi maraa doole remugol, awa kadi toragol no hersinanii lan. ⁴ Mi andii ko mi wada fii yo mi heboy ko wernammi ka mun tuma mi ittaa e mbatulayaagal.›

⁵ «Onsay o nodditi kala joganiibe jom makko ben. O wi'i arano on: <Ko jelu joganidaa jom an?› ⁶ On jaabii: <Ko tankonje teemedere nebban.› Ontuma

mbatulaajo on wi'i mo: <Joodo kisan, yettaa kaydi maa ndin, windaa ko cappande jowi joganidaa mo.›

⁷ «O wi'i goddo goo kadi: <An-le ko jelu joganidaa mo?› On jaabii: <Ko bootooji teemedere ngawri.› O wi'i ondon kadi: <Yettu kaydi maa ndin, windaa ko bootooji cappande jeetati joganidaa mo.›

⁸ «Onsay jom on mbatulaajo boyliido manti mo sabu kon ko on golliri yoyre. Ko fii faybe nguu jamaanu no yoyi telen yokondoobe mun ben buri faybe jeyaabe ben ka ndaygu. ⁹ Min-le mi wi'ay on: yo on dabbir dee jawle adunayankeeje yibbe, fii tuma nde den lanniroyi on, yo on wernoye ka galleeji poomayankeeji.

¹⁰ «Mo nundii e hoore ko fandi, o nunday e hoore ko mawni. Awa kadi mo nundaali e hoore ko fandi, o nundataa e hoore ko mawni. ¹¹ Si tawii non on nundaali e hoore jawle adunayankeeje den, haray ko hombo halfinoya on jawle haqiiqaaje den? ¹² Awa kadi si on nundaali e hoore ngel goddo ngel, ko hombo jonnoyta on ko mon kon?

¹³ «Golloowo hay gooto waawataa gollande jeybe dun dido, ko fii o ajay oya, o yida oya, maa o habboo e oya, o itta bote e oya. Ko dun wadi si on waawataa rewude Alla, rewon jawdi.»

¹⁴ Fariisiyaabe* ben e yidude mun kaalisi no hedotonoo dun fow liba bote e Iisaa.

¹⁵ O wi'i 6e: «Onon hidon wadi hoore mon feewube e yeeso yimbe ben, kono Allaahu on kajun no andi ko woni ka berde mon. Ko fii ko yimbe ben banti fii mun kon ko niddudun yeeso Alla.

¹⁶ «Awa ko Sariya on e defte annabaabe ben wonnoo haa fewndo Yaayaa. Kono gila e fewndo Yaayaa, Kibaaru Moyyo fii *laamu Alla ngun no fejninede, mo kala no huutorde doole fii naatugol don. ¹⁷ Kono mi andinii on: kammu ngun e leydi ndin mutude no buri newaade edii ciifun gootun wonkun ka Sariya monteede.

¹⁸ «Kala accitudo beyngu mun, yetti goddo goo, haray ontigi jeenii. Awa kadi kala yettudo debbo seedaado, haray ondon kadi jeenii.

Fii Galo Baaso e Baaso Galo

¹⁹ «Hari no woodunoo aaden galو bornotonoodo conci dimi firsiniraadi ko wojji, wadaynoodo jnande woo welii e fotii. ²⁰ Tawi miskiino wi'eteedo Laazaru mo bandu mun fow temmaa no waalii ka dambugal makko. ²¹ On no faaletenoo hendaade jaameteeji luttaynoodi din ka on galو. Tawi hay bareeji din arayno metta den temmeeje makko.

²² «Nande goo on miskiino maayi, malaa'ikaabe ben nabi mo tawtinoyi Ibraahiima. On galو kadi maayi, surraa. ²³ Ka jahannama, tawi on galо no e nder lette, o banti gite, o haynii Laazaru takko Ibraahiima ka wodditii. ²⁴ O ewnii, o wi'i:<Baaba an Ibraahiima, yurme lan, yamira Laazaru yo o jullu hondu makko ndun ka ndiyan, o ara o bussinanammi denngal an ngal. Ko fii mido tampi ka yiite gaa!>

²⁵ «Ibraahiima jaabii mo, wi'i:<Boobo an, anditu an a hendinoke moyyereiji maa din ka aduna, wano non kadi Laazaru yedinoke ton tampereeji. Jooni non kanko bernde makko buttinaama doo, an hida tampude. ²⁶ E hoore dun kadi, wimbo moolanaango no wadaa hakkunde men fii wota faalaabe iwde gaa yaha ton ben waawu dun, wano non onon kadi wota on waawu lumbitirde gaa.>

²⁷ «Onsay on galо wi'i:<Awa mi torike ma yo baaba an, nelanan Laazaru ka galle ben an ²⁸haa e bee neene-gootoobe an njowo, o hajoyoo be dun fii wota kambe kadi be aroy e ndee nokkuure lette.>

²⁹ «Onsay Ibraahiima jaabii mo, wi'i:<Hibe jogii ton deftere Muusaa nden e defte beya annabaabe, yo be hedo den.>

³⁰ «O wi'i:<Oo'o, yo baaba an Ibraahiima, kono si goddo e maybe ben yahii e mabbe, be tuubay.>

³¹ «Kono Ibraahiima wi'i mo: <Si be hedaaaki Muusaa e annabaabe heddiibe ben, haray be jabataa wurteede hay si be immintinanaama goddo e maybe ben!>»

Fii Junuubu e Gomdinal e Farilla

(*Mat. 18.6-7; Mrk. 9.42*)

17¹ Isaa wi'i taalibaabe mun ben: «Alaa no peggal ronkirta arirde, kono bone wonanii on wondo sabu dun. ² Haray ko buri mo moyyande ko kolmbireede tuntere hayre, o bugee ka baharu edii o wonude sabu gokkun e koy paykoy feggaade. ³ Reenee hoore mon!

«Si musiddo mon oonike, waajee mo. Si o tuubii, yaafee mo. ⁴ Awa kadi si o bonnii on laabi jeedidi e nder nallal, o yiltitoyike e mon laabi jeedidi hara himo wi'a: <mi tuubii>, on yaafoto mo.»

⁵ Sahaabaabe* ben wi'i Koohoojo on: «Beydanee men gomdinal.»

⁶ Onsay Koohoojo on wi'i be: «Hay si tawii gomdinal mon ngal no fota e abbere bene, harayno on waaway yamirde kii ndologahi, wi'on: <Boro, iroyodaa ka tumbo baharu!, onsay ki doftoto on.

⁷ «Hara ko hombo e mon, si no mari kurkaadujo remoowo maa ngaynaako, wi'ata on no o iwtiri golle: <Aru jaamaa? ⁸ Kono ka liddu dun, o wi'ay mo: <Moyyinanen ko mi jaama, bornodaa si bannanaa mi. Si mi gaynii jaamude yara, onsay an kadi a jaamay yaraa. ⁹ Hara o mantay on kurkaadujo fii o wadii ko o yamiraa kon? ¹⁰ Onon kadi wano non, si on wadii ko yamiradon kon fow, wi'ee: <Menen ko men kurkaaduube meereebe, ko ko men haani wadude tun men wadi.»»

Fii Yimbe Sappo be Damajan Nangi

¹¹ E nder yaadu makko ndun Yerusalaam, kanko Iisaa o rewri hakkunde diiwal *Samariiya ngal e diiwal Jaliilu ngal. ¹² Wa fewndo ko o naataynoo e hodo, yimbe

sappo ɓe damajan nangi sutii fottugol e makko, ɓe dartii ka woddì, ¹³ ɓe ewnii, ɓe wi'i: «Iisaa, ko onon yo Karamoko'en! Yurmínee men!»

¹⁴ Bay o yi'ii ɓe, o wi'i ɓe: «Yahee hollitoyodon *yottinoobe sadaka ɓen.»

E nder yaadu mabbe ndun ɓe tawi ɓe sellinaama, ɓe laabii. ¹⁵ Bay goddo e mabbe tawii sellinaama, o yiltitii e hoore himo ewnoo manta Alla. ¹⁶ Hawri on neddo ko Samariyankeejo. O ari, o yani e ley koyde Iisaa, o weltanii mo.

¹⁷ Onsay Iisaa yetti haala kan, wi'i: «Hinaa ɓe sappoo non ɓe sellinaama, ɓe laabii? Awa ko honto njeenayoobe luttube ɓen woni? ¹⁸ Hinaa hay gooto e mabbe yiltitaaki fii mantugol Alla si wonaa oo janano doo tun?» ¹⁹ Onsay o wi'i on: «Immo yahaa, gomdinal maa ngal hisinii ma.»

Maandeeji Fii Arugol Laamu Alla ngun

(Mat. 24.23-28, 37-41)

²⁰ Nande goo *Fariisiyaabe ɓen landii mo kanko Iisaa ko honde tuma *laamu Alla ngun arata. Iisaa jaabii ɓe, wi'i: «Laamu Alla ngun ardataa no yi'orta. ²¹ Wi'etaake 〈hingu doo!〉 maa d'un 〈hingu daa!〉, ko fii mi andinii on, laamu Alla ngun no e mon.»

²² Onsay o wi'i taalibaabe makko ɓen: «Saa'i aroyay nde faalededon yi'ude wootere e jalaade *Bii-Aaden on, kono on yi'oytaa nde. ²³ On wi'oyte 〈himo doo!〉 maa 〈himo daa!〉 Wota on hammir ton, wota on dogir ton. ²⁴ Awa ko wano mayannde mayirta non, jalba gila nano haa e jaamo ka weeyo, ko wano non ardu Bii-Aaden on woniroyta ka jalaande mun. ²⁵ Kono doo e d'un, bee o tampa fota, nguu jamaanu doo hawka mo.

Fii Hebulanagol Saa'i Artoygol Bii-Aaden on

(Mat. 24.37-41)

²⁶ «Ko wadunoo kon fewndo jamaanu Nuuhu, wadoyay kadi ka jalaade ado artugol Bii-Aaden on. ²⁷ Ko fii fewndo Nuuhu, hari yimɓe ɓen no jaamaynoo yara,

no jomba jombanee, haa nande Nuuhu naatunoo ka laana. Onsay waamere nden ari, muli luttube 6en fow.

²⁸ «Ko wano non kadi e fewndo jamaanu Luutu, yimbe ben no jaamaynoo yara, sooda soodita, tuta darna. ²⁹ Kono nde Luutu yaltunoo *Saduumma, mbollan yiite iwrung ka kammu yani e mabbe, muli 6e fow.

³⁰ «Ko wano non kadi woniroyta jande Bii-Aaden on feeniti. ³¹ Nden jande, on wondo ka fowtorde hoore suudu mun wota tippano piiji mun wondi din ka nder suudu. Wano non kadi on wondo ka ngesa wota yiltito ka mun. ³² Anditee fii sonnaajo Luutu on. ³³ Kala dabbudo no dandira ngurndan mun, dan hayriray mo, kono kala non mo ngurndan mun hayrinaa, o dandoyay dan.

³⁴ «Mi andinii on kadi, e nden jemmaare don, yimbe dido waalodube e danki wooti, goddo e mabbe yettete, oya on lutta. ³⁵ Wano non kadi, rewbe dido wonbe unidude, goddo e mabbe yettete, oya on lutta. ³⁶ Awa kadi yimbe dido wondube e ngesa woota, gooto e mabbe yettete, oya on lutta.»

³⁷ Taalibaabe ben wi'i mo: «Koohoojo amen, hara ko honto dun wadoyta?»

O jaabii 6e, o wi'i: «Ko ka ko maayi kon woni woo, jigaaje den moobotoo.»

Misal Yettaangal e Naawoowo Boyliido

18¹ Isaa wadani taalibaabe mun 6en ngal misal fii banginangol 6e nafa duumagol e toraare Alla, hara 6e haabaali. ² O wi'i 6e: «No woodunoo e saare aaden jaawoowo mo hulataa Alla, awa kadi o hersataa hay gooto. ³ Tawi kadi no e nden saare keynguujo araynoodo soono woo ka on jaawoowo, wi'a mo: «Naawu hakkunde an e oo gajno an.»⁴ Gila neebii hari on jaawoowo anniyaaki. Kono 6awto dun o wi'itii: «Fii kala mi hulataa Alla, awa kadi mi hersataa hay gooto, ⁵ bay oo keynguujo sonjirii lan nii, yo mi jaawan mo fii wota o sonjan jande woo!»»

⁶ Koohoojo on wi'i: «On nanii ko on jaawoowo boyliido wi'i kon? ⁷ E taw si hara Allaahu on jaawantaa 6en 6e o subii, dun ko 6en torotoobe mo jemma e

nalorma? Hara o nennanay ɓe dun? ⁸ Mi andinii on, o jaawanay ɓe ko yaawi.
Kono taw nde *Bii-Aaden on aroyi si o tawoyay gomdinbe e hoore ndii leydi?»

Fii Hakkunde Fariisiyaajo on e Yantoowo Sagalle on

⁹ O wadi kadi ngal misal doo e hoore ɓen yimbe fellitube ko feewube, hara hibe aybina beya, ¹⁰ o wi'i ɓe: «Yimbe dido yahuno ka *juulirde mawnde fii juulugol, tawi goddo on ko *Fariisiyaajo, oya on ko yantoowo sagalle. ¹¹ Fariisiyaajo on immii darii, tawi himo tororanaynoo nii hoore makko, wi'a: ‹Eyoo-maa Alla, mi weltanike ma ko tawi kon mi wa'aa wa heddiibe ɓen, dun ko bee jattoobe maa ɓee boyliibe maa bee jeenoobe maa wano oo yantoowo sagalle doo. ¹² Min-le mi hooray laabi didi e nder yontere nden, awa kadi mi ittay sappabun e hoore kala ko mi hebi.»

¹³ «Tawi on yantoowo sagalle hay suusataano ɓantirde gite mun den ka kammu, kono himo darii ka wodditii, himo tappitoo e bernde, wi'a: ‹Yaa an Alla, yurminan min oo junuubankeejo!›

¹⁴ «Mi andinii on, ko on yantoowo sagalle don-le yiltitinoo ka galle mun e hoore ko o jogoraado wa feewudo edii Fariisiyaajo on. Ko fii kala mawnintiniido jippinoyte, awa kadi kala jippindo hoore mun mawninoyte.»

Fii Hakkunde Iisaa e Paykoy koy

(Mat. 19.13-15; Mrk. 10.13-16)

¹⁵ Wobbe addanayno mo hay booboobe ɓen fii yo o meemu ɓe. Nde taalibaabe ɓen yi'unoo dun, ɓe tonjani ɓe. ¹⁶ Kono Iisaa nodditi paykoy koy e hoore himo wi'a: «Accee paykoy koy ara e an, wota on hadu koy, ko fii *laamu Alla ngun ko sifa makkoy wonani. ¹⁷ Ka haqiqha mi andinii on, kala mo jabiraali laamu Alla ngun wa paykun, haray o naatataa ton few.»

Fii Hooreejo Aldudo on

(Mat. 19.16-30; Mrk. 10.17-31)

¹⁸ Hooreejo goo landii Iisaa, wi'i: «Karamokoojo moyyo, hara ko hondun mi haani wadude fii yo mi heboy *ngurndan poomayankejan dan?»

¹⁹ Onsay Iisaa jaabii mo, wi'i: «Ko fii hondun wi'irtaa mi moyyo? Hay gooto moyyaa si hinaa Alla Bajjo on. ²⁰ Hida andi yamirooje den, dun ko wota a jeenu, wota a ittu hoore, wota a wujju, wota a seedito fenaande, teddinaa kadi yumma maa e ben maa.»^u

²¹ On hooreejo jaabii, wi'i: «Mido wadude dun fow gila e cukankaaku an.»

²² Bay Iisaa nanii ko on wi'i kon, o wi'i mo: «No ɿakkan-maa fahin huunde wootere: yeeyitu kala ko jeydaa, senditanaa miskinbe ɓen, dun wonanoyte keyee ka kammuuli, onsay araa jokkaa mi.»

²³ Bay on nanii dun, o aani, ko fii hari himo aldi fota. ²⁴ Bay Iisaa yi'ii dun e makko, o wi'i: «Emba no sattani jom jawle en ka ɓe naata ka laamu Alla. ²⁵ No ɓuri weebande ngelooba ka mba rewa e wuddere meselal edii ka jom jawle en naata ka laamu Alla.»

²⁶ Wonnoobe mo hedaaade ɓen wi'i: «E hara ko hombo dandoytee?»

²⁷ Iisaa jaabii ɓe, wi'i: «Ko waawantaako neddanke kon no waawanoo Alla.»

²⁸ Onsay Petruusu wi'i mo: «Awa e hino, men accii ko men jeyi kon fow, men jokkii on.»

²⁹ Iisaa jaabii ɓe, wi'i: «Ka haqiiqa mi andinii on, kala accudo suudu mun ndun e beyngu mun e sibbe mun ɓen e mawbe mun ɓen e bibbe mun ɓen sabu laamu Alla ngun, ³⁰ o heboyay ko ɓuri dun ka adunadoo, awa kadi ka aduna aroyoowo, o heboyay ngurndan poomayankejan dan.»

^u18.20 Egg. 20.12-16.

Fii ko Saatii Heboyde Iisaa kon

(Mat. 20.17-19; Mrk. 32-34)

³¹ Onsay Iisaa pottini *sahaabaabe mun ben sappoo e dido sera, o wi'i be: «Awa hidén yahude Yerusalaam. Kala ko annabaabe ben windunoo kon e hoore Bii-Aaden on laatopto. ³² O wattoyte e juude be wonaa Yahuudiyanke ben, o jalee, o tiwee, tuttee e hoore makko, be piyira mo cabbi, be wara. ³³ Bawto dun o immitoo ka nalaande tammere.»

³⁴ Kono ben taalibaabe faamaali hay fus e dun, din kongudi wirnanii be, be ronki faamude kon ko yewtaa.

Fii no Iisaa Wuntiniri Bundo Yeerikoo

(Mat. 20.29-34; Mrk. 10.46-52)

³⁵ Ko Iisaa badii Yeerikoo, tawi bundo no joodii ka sera laawol no toroo. ³⁶ On nani hito jamaa on ko feyyata kon, o landii ko hondun wadi. ³⁷ O andinaa wonde ko Iisaa oo jeyaado Naasirata woni feyyude. ³⁸ Onsay o ewnii, o wi'i: «Ko an yo Iisaa, bii Daawuuda, yurminan!»

³⁹ Hikkinoobe yeeso ben feli mo fii yo o fanku, kono o burti ewnaade, wi'a: «Ko an yo bii Daawuuda, yurminan!»

⁴⁰ Onsay Iisaa dartii, o yamiri yo be addan mo mo. Bay on badike, Iisaa landii mo: ⁴¹ «Ko hondun faaladaa yo mi wadane?»

On jaabii mo, wi'i: «Koohoojo, ko yo mi hettu giide an den!»

⁴² Onsay Iisaa jaabii mo, wi'i: «Wuntu, gomdinal maa ngal hisinii ma.»⁴³ O wunti don kisan, o jokki Iisaa, himo mawnina Alla. Bay jamaa on yi'ii dun, be woni e mantugol Alla.

Fii Gomdinal Zaakaru ngal

19¹ Isaa naati Yeerikoo. Ko o tayitata saare nden,² tawi aaden galoo tawaado e hooreebe yantooobe sagalle ben wi'eteedo Zaakaru³ no humpanoo yi'ugol mo kanko Iisaa. Kono o ronki feere mun sabu duudugol jamaa on, awa kadi himo rabbidi.⁴ Onsay o dogi o feyiyi yeeso, o yawoyi e hoore yibbehi fii no o yi'ira Iisaa, bay hari on ko don rewata.

⁵ Nde Iisaa hewtunoo e ley kin yibbehi, o tiggiti, o wi'i: «Zaakaru, tippo henja, ko fii bee mi weera hande ka galle maa.»⁶ Zaakaru tippii henja, jabbii mo e nder weltaare.

⁷ Bay fow yi'ii dun, be yuni, be wi'i: «Oo kodoyike junuubankeejo!»

⁸ Kono Zaakaru immii darii, wi'i Koohoojo on: «Hedee yo Koohoojo an, mi okkay miskinbe ben feccere jawdi an ndin. Awa kadi si mido bonnani goddo godduun, mi yositiray ontigi dun cowalle nay.»

⁹ Onsay Iisaa wi'i: «Hande kisiyee naatii e dee galle doo. Ko fii oo doo kadi ko o iwdi Ibraahiima.¹⁰ Awa ko addi *Bii-Aaden on ko daffitugol majube ben, danda be.»

Misal Yettaangal e Manankun

(Mat. 25.14-30)

¹¹ Bay hari o badike Yerusalaam, o beyditani be ngal misal doo, ko fii hari hedinoobe mo ben no sikka *laamu Alla ngun feejay kisan.¹² O wi'i be: «Aaden dimo yahuno e leydi woddundi fii lamminoyegol, arta.¹³ On noddi kurkaaduube mun sappo, o jonne be manankunji sappo. O wi'i be: <Gollitiree dii doo haa mi ara.>

¹⁴ Kono tawi yimbe leydi makko ndin no anjmo. Be nelti wobbe baawo makko fii andingol ben ton wonde be faalaaka ondon laamoo be.

¹⁵ «Bay o lamminoyaama, o artii, o nodditi kurkaaduube makko be o jonnunoo mbuudi ben fii no o andira ko honno mo bee e maabbe gollitiriri di.

¹⁶ «Arano on e mabbe ari, wi'i: <Koohoojo an, di accirnodon mi din beydike cowalle sappo.>¹⁷ O wi'i mo: <A wadii ko moyyi, yo kurkaaduujyo moyyo! Ko fii a nundii e hoore ko fandi, mi wadii ma yeesoojo e hoore ca'e sappo.>

¹⁸ «Dimmo on e mabbe ari, wi'i: <Koohoojo an, di accirnodon mi din beydike cowalle jowi.>¹⁹ O wi'i ondon kadi: <Mi wadii ma e hoore ca'e jowi.>

²⁰ «Goddo e mabbe kadi ari, wi'i: <Koohoojo an, e hino di accirnodaa mi din, hari mido mari di e lincun.²¹ Ko fii hari mido hulu maa, bay ko a jaadudo. A yettay ko a wallinaa, awa kadi a sonitay ko a aawaa.>

²² «Onsay on lando wi'i mo: <Mi jaawitirte kongudi maa din, yo jiyaado bondo! Hida andunoo ko mi aaden jaadudo? Maa mi yettay ko mi wallinaa, maa mi sonitay ko mi aawaa?²³ Fii hondun non a wallinaali di e juude gollitiroobedi ben,^wdun, nde mi artunoo woo, mi hettayno di e hoore tono.>

²⁴ «Ontuma kanko lando on o wi'i wonnoobe don ben: <Jabitee di e juude makko, jonnou di oo jogiido manankunji sappo.>²⁵ Kono be wi'i mo: <Koohoojo amen, ondon no jogii manankunji sappo!>²⁶ O jaabii be, o wi'i: <Mi andinii on, ko mardo beydantee, kono mo maraa on jabitante hay yero ko o mari kon.²⁷ Dun-le wurin addanee lan doo aybe an ben, ben be faalanooka mi laamoo dun, waron be yeeso an doo.>>

Fii Naatugol Iisaa Yerusalaam

(Mat. 21.1-11; Mrk. 11.1-10; Yhn. 12.12-19)

²⁸ Bay kanko Iisaa o gaynii yewtude dun, o hikkii yeeso, o yaari Yerusalaam.

²⁹ Bay wonii o badike Bayti-Faazii e *Betanii, dun ko takko Fello *Zaytuuni ngon, o nuli taalibaabe makko dido,³⁰ o wi'i be: «Yahee e ngoo hodo wongo yeeso mon doo. No naatirdon e maggo, on taway mbabun kun goddo waddaaki haa hande no

^w19.23 Wallingol mbuudi e «juude gollitiroowo di on» no firi wallingol di ka «banki.»

humii don. Hunton kun, addon.³¹ Si godđo aru on e landaade, wi'a: «Ko hondun huntandon kun?», on wi'ay mo: «Ko haaju Koohoojo on yani e makkun.»»

³² Nelaabe ben yahi ɓe tawroyi no ɓe wiiranoo non.³³ Ko ɓe huntata kun, jeybe mbabun kun ben wi'i ɓe: «Ko hondun wondon kun huntande?»

³⁴ Be jaabii, ɓe wi'i: «Ko haaju Koohoojo on yani e makkun.»

³⁵ Be addani kun Iisaa, ɓe ndaddani mo conci maɓbe dín e hoore makkun si ɓe yawni mo.³⁶ No o yaaraynoo non, yimɓe ben no ndaddirande mo non conci mun din ka laawol.

³⁷ Nde tawnoo o ɓadike Yerusalaam ka tippagol Fello Zaytuuni, dental taalibaabe ben fow sowti weltaare, ɓe woni e ewnagol manta Alla, sabu dii kaawakeeji moyýi di ɓe yi'i.³⁸ Tawi hibé wi'a:

«Yo barki wonan oo lando
wondo arude e innde Joomiraado on.^y
Yo buttu wonu ka kammu,
darja ɓurdo toowude wonanii ma!»

³⁹ Wobbe e *Fariisiyaabe tawaabe e mbatu ngun ben wi'i mo kanko Iisaa:

«Karamoko'en, yamiree taalibaabe mon ben yo ɓe fanku!»

⁴⁰ O jaabii ɓe, o wi'i: «Mi andinii on, si kambe ɓe fankii, kaaye den sowtay!»

⁴¹ Bay ɓe ɓadike saare Yerusalaam nden, nde Iisaa haynornoo nde, o fesi fii mayre,⁴² o wi'i: «Si an kadi hida andunoo hande ko wonanayno-maa buttu, kono jooni dun wirnanike ma.⁴³ Aroyay e nalaade nde aybe maa ben ari hunditu-maa hurgi, bittire cende fow.⁴⁴ Be lancete, ɓe lancide e kala hodudo e maa. Be accataa e maa hay kaayun e hoore hayre, sabu a anditaali saa'i mo Alla hoddiri faabagol ma on.»

^y19.38 Zab. 118.26

Fii no Iisaa Radori Yeeyooobe ben ka Juulirde Mawnde

(Mat. 21.12-17; Mrk. 11.15-19; Yhn. 2.13-16)

⁴⁵ O naati ka dingiral *juulirde mawnde, o woni e radagol wonnoobe yeeyude ton ben, ⁴⁶ hara himo wi'ora be: «No windii: ‹Suudu an ndun ko suudu torordu Alla›,^y kono onon on wattii ndu fammeere wuybe!»^z

⁴⁷ Tawi kanko Iisaa jande woo o jannayno ka juulirde mawnde. Kono hooreebe *yottinoobe sadaka ben e jannoobe fii Sariya on ben e lambe jamaa on no dabbaynoo no sahinbinira mo. ⁴⁸ Kono hari be andaa ko honno be gerdata, sabu hari jamaa on fow no tudi noppip mun e makko.

Lande fii Bawgal Iisaa ngal

(Mat. 21.23-27; Mrk. 11.27-33)

20 ¹E nder den balde don, tawi Iisaa no waajaade jamaa on ka *juulirde mawnde, dun-le ko fejnjinangol be Kibaaru Moyyo on. Onsay hooreebe *yottinoobe sadaka ben e jannoobe fii Sariya on ben wondude e mawbe ben ari, ²wi'i mo: «Wowlan men ko e ley kongol hombo wondaa wadude dun e ko e ley kongol hombo wondaa?»

³ O jaabii be, o wi'i: «Min kadi mi landoto on huunde wootere, jaabodon mi. ⁴E hara lootugol ko Yaayaa lootaynoo yimbe ben kon, ko ka arsi iwri kaa ko e neddanke?»

⁵ Kono ben woni e wi'indirgol: «Si en jaabike mo ko ka arsi iwri, o wi'ay en ko hondun hadunoo gomdinen mo? ⁶ Si en jaabike mo-le ko e neddanke dun iwri, jamaa on fow fiday en kaaye, sabu hibe felliti Yaayaa ko annabaajo.»⁷ Onsay be jaabii mo, be wi'i: «Men andaa ka ngol lootugol don iwri.»

^y19.46a Isa. 56.7

^z19.46b Yer. 7.11

⁸ Onsay Iisaa wi'i be: «Min kadi mi wowlantaa on ko e ley kongol hombo mi woni wadirde dün.»

Misal Yettaangal e Fariisiyaabé ben

(*Mat. 21.33-46; Mrk. 12.1-12*)

⁹ Ontuma o fewtiti jamaa on, o wadani be ngal misal doo, o wi'i be: «Goddö tutuno *wiijnu, o halfini tutateeri ndin remoobe wiijnu ben, o yahi safaari ka o neeboyta. ¹⁰ Bay saa'i sonitugol wiijnu on hewtii, o immini kurkaadu makko haa e remoobe wiijnu ben fii yo ben jonnan mo bïbïbe wiijnu gebal makko ngal. Kono ben piyi on, be immintini mo juude mehe. ¹¹ O immini kurkaadu makko goo kadi, be piyi ondon kadi, be hersini, be immintini mo juude mehe. ¹² O immini tammo kadi, be barmini ondon kadi, be radii.

¹³ «Jom tutateeri ndin wi'i: <Ko hondun mi wadata jooni? Yo mi immin bïddö an yidaado on, no gasa ka be teddinoya ondon.> ¹⁴ Kono no ben remoobe wiijnu haynornoo mo, be wi'indiri: <Ko oo woni ronoowo on, waren mo fii yo ndondi ndin wontan en!> ¹⁵ Onsay be nabi mo ka baawo tutateeri, be wari.»

Iisaa wi'i kadi: «Jooni non, hara ko hondun jom ndin tutateeri wiijnu wadata ben? ¹⁶ On aray, re'a ben remoobe wiijnu, o halfina ndi wobbe goo.»

Bay ben hedinoobe mo kanko Iisaa nanii dün, be wi'i: «Wota dun wonir non!» ¹⁷ E nder ko o tenyinta be kon, kanko Iisaa, o wi'i: «Hara ko hondun koo ko windii firi:

<Hayre nde mahoobe ben hawkunoo nden

wontii hittunde ka sobbundu>^a

¹⁸ «Awa kala yanudo e nden hayre, o lancoto,

kala kadi mo nde yani e hoore mun, o muncoto.»^b

^a20.17 Zab. 118.22

^b20.18 Isa. 8.14-15

¹⁹ Bay hooreebe yottinoobe sadaka ɓen e jannoobe fii Sariya on ɓen faamii wonde ko e hoore mabbe Iisaa wadi ngal misal, tawi hibe dabbude no ɓe fawira juude e makko don kisan, kono hari hibe huli jamaa on.

Fii no Iisaa Ndarndoraa fii Yoɔugol Sagalle

(Mat. 22.15-22; Mrk. 12.13-17)

²⁰ Be woni e aynugol Iisaa, ɓe immini e makko tefooбе bonbe waditiibe ko feewube fii ko nangira mo kongudi makko din, watta mo e juude laamu ngun e ley kongol lamminaado diiwal ngal. ²¹ Ben landii mo, wi'i: «Karamoko'en, meden andi hidon jannude waajoo no feewiri, awa kadi on burdindinaa yimbe ɓen, hidon jannirde laawol Alla ngol goonga. ²² E hara no haani ka men yoba lando mawdo Roomu on sagalle kaa haanaa?»

²³ Kono bay Iisaa faamii janfa mabbe kan, o jaabii ɓe, o wi'i: ²⁴ «Hollee lan *dinaruuru. Ko nandolla hombo e bindi hombo woni e mayru?»

Be jaabii: «Ko lando mawdo Roomu on.»

²⁵ Onsay o jaabii ɓe, o wi'i: «Jonnitee lando mawdo Roomu on ko makko kon, jonniton Alla kadi ko mun kon.»

²⁶ Be ronki hebude feere no ɓe nangira mo e din kongudi makko yeeso jamaa on, kono bay ɓe ɣaldidii e ngol jaabawol makko, ɓe deyfí.

Fii Sadduusiyaabe ɓen e Ummatal ngal

(Mat. 22.23-33; Mrk. 12.18-27)

²⁷ Wobbe e bee *Sadduusiyaabe, wi'ube wonde ummutal alaa ɓen, ari landii Iisaa, ɓe wi'i mo: ²⁸ «Karamoko'en, e hino ko Muusaa wi'i men kon: Si goddo maayii accii beyngu e baawo biddo, haray mijnjiraawo on maydo no haani yettude on keynguujo mo o acci fii no o hebirana on kotiraawo makko jurriya. ²⁹ Tawa non no woodi bibbe njeedido. Arano on jombii, maayii, hebaali biddo. ³⁰ Dimmo on kadi

yettii mo, maayii.³¹ Tammo on kadi wano non. Dun yaarii non haa ben njeedido non be timmi, be accaali jurriya.³² Bawto dun debbo on kadi maayii.³³ Bay hari ben njeedidoo non resii on debbo, ko hombo e ben on debbo wontanoyta ka ummutal?»

³⁴ Iisaa jaabii be, wi'i: «Faybe nguu jamaanu doo tiggay tiggete.³⁵ Kono ben yedoyaabe immintineede e hakkunde maybe ben e tawegol e nguu jamaanu aroyayngu, resoytaa, resetaake.³⁶ Awa kadi be maayitoytaa, ko fii haray hibe wa'i wa malaa'ikaabe. Ko be faybe Alla kadi, bay ko be biibbe ummutal ngal.³⁷ Seedee maybe ben immitoto, ko dun Muusaa banginnoo ka o wowli don fii pitahun kun fewndo o noddi Joomiraado on, on Alla Ibraahiima e Alla Issaaqa e Alla Yaaquuba.^{c38} Awa Alla wonaa Alla maybe ben, kono ko o Alla wurbe ben, bay fii makko kanko, ben fow ko wurbe.»

³⁹ Wobbe e jannoobe fii Sariya on ben wi'i mo: «Karamoko'en, on yewtii haqiiqa.»⁴⁰ Bawto dun be suusaali mo landaade hay huunde.

Fii Hakkunde Almasiihu on e Daawuuda

(Mat. 22.41-46; Mrk. 12.35-37)

⁴¹ Iisaa wi'i be: «Ko honno wi'iraa wonde *Almasiihu on ko jurriya Daawuuda?

⁴²⁻⁴³ Daawuuda tigi no holli ka Zabuura wonde:

⟨Joomiraado on daalani Joomi an on:

Joodor ka sengo an jaamo

haa mi wada aybe maa ben ka ley teppe maa.»^d

⁴⁴ «Daawuuda tigi wi'ii Almasiihu on ⟨Joomi⟩, haray ko honno non Almasiihu on woniri jurriya makko?»

^c20.37 Egg. 3.6

^d20.42-43. Zab. 110.1

⁴⁵ Fewndo ka yimbe ben fow hedii mo don, o wi'i taalibaabe makko ben:

⁴⁶ «Reenee e bee jannoobe fii Sariya on, dun ko bee yidube jindidugol e dolokkaaji njani, yidi hiwreede ka fottirde, yidi saffawol aranol ngol ka juulirde, yidi ndaddule arane den ka nafagol. ⁴⁷ Hibe jatta galleeji keynguube, hibe juutina julde mabbe fii yiingo, awa ben heboyay naawooje burde sattude.»

Fii Sadaka mo Keynguugo on Itti on

(*Mrk. 12.41-44*)

21 ¹ Onsay Iisaa banti gite mun den, o yi'i alsube no itta sadakaaji, watta ka nder arkawal sadaka. ² O yi'i kadi keynguugo baaso no liba ton tammahoy didoy. ³ Onsay o wi'i: «Mido haalande on goonga, oo keynguugo baaso no buri beya fow ko ittaa. ⁴ Ko fii beya fow ko ko burtani dun kon be wadi, kono kanko keynguugo on e waasidude, ko ko o mari kon fow fii ko o wuurira o wadoyi ton.»

Maandeeji fii Artoygol Iisaa Almasiihu on

(*Mat. 24.1-2; Mrk. 13.1-2*)

⁵ Nde tawnoo wobbe no yewta fii *juulirde mawnde nden e kon ko nde fotiniraa kaaye labaade e piiji ittaadi sadaka, onsay Iisaa wi'i be: ⁶ «Nalaade no ara nde tawata koo ko yi'oton doo fow lancaama, hay hayre e hoore hayre luttoytaa doo.»

⁷ Onsay be landii mo, be wi'i: «Karamoko'en, ko honde huma dun wadoyta e ko hondun wonoyta maande laatagol dun?»

⁸ Iisaa jaabii be, wi'i: «Reenee e faljineede, ko fii buy aroyay baarora innde an nden hara no wi'a ko kajun woni *Almasiihu on, saa'i on badike. Wota on jokkoy ben. ⁹ Awa kadi nde nanoydon fii hareeji e murtaldu woo, haray wota on hulu. Ko fii ko dun haani adaade wadude, kono lannoode nden hinaa don kisan.»

¹⁰ O wi'i be kadi: «Hareeji wadoyay hakkunde leyyi din. Laamateeriji din kadi immondirana. ¹¹ Awa kadi dimbande leydi tiidude wada, heege e nabbeeli raabooji

wada e nokkeeli goo, kaawakeeji hulbiniidi wada, maandeeji njani kadi wada ka kammu.

¹² «Kono doo e dun, ɓe faway on juude, ɓe cukkoo on, ɓe naboyay on ka juulirde, ɓe bugoo on ka kaso, ɓe ardoon haa e lamɓe ben e yeesoobe diiwe den sabu innde an nden. ¹³ Kono dun wonanoyay on sabu no seeditoron. ¹⁴ Fibee ka berde mon wonde on hebulotaako jaabagol ko liddetedon kon. ¹⁵ Ko fii mi okkoyay on faamu, mi longina on kongudi haa ka tawata aybe mon ben waawataa dartaade on maa yedda. ¹⁶ Awa hay mawbe mon ben e neene-gootoobe mon ben e sibbe mon ben e yibbe mon ben wadoyay on e joge ɓe wona sabu wobbe e mon waree. ¹⁷ Fow ajoyay on sabu innde an nden. ¹⁸ Kono cukulol hoore mon hay gootol majjoytaa. ¹⁹ Kono si on ɣajjrike, haray on hiwii wonkiji mon din.

²⁰ «Nde yi'udon koneeli din daakanike saare Yerusalaam nden haa hunditii woo, haray andee lancagol mayre badike. ²¹ Onsay yo hodube ka diwal Yahuuda ben dogir ka pelle, yo wonbe ka nder saare Yerusalaam ben kadi yaltu. Wota wonbe ka fulawaa ben kadi aru ka saare. ²² Ko fii den wonoyay nalaade yottande fii laatingol kala ko windinoo. ²³ E nder den balde don, bone wonanay sowiibe ben e muyninaybe ben. Ko fii annde tiifunde waday e leydi ndin, tikkere yana e hoore oo jamaa. ²⁴ Be libiroyee mbelndi kaafa, ɓe nabee, ɓe maccindinanoyoo leyde den fow. Be wonaa Yahuudiyanke ben yaabitaa Yerusalaam haa saa'iiji di ɓe happanaa din timma.

²⁵ «Awa kadi maandeeji wadoyay ka naange e ka lewru e ka koode. Jamaaji din maapoo ka hoore leydi haa ɓe jiboo ko be wada sabu uumaango ndiyan dan ka baharu e ko dan piyondirta kon. ²⁶ Yimbe ben faddee kulol e nder ko be mijotoo fii ko aroyta ka hoore leydi kon, ko tiidi kon ka kammu kadi dimboyoo. ²⁷ Ontuma non *Bii-Aaden on yi'oyte, no ara e duulere, hara himo arda e bawgal e mangural mawngal. ²⁸ Nde dun fuddii wadude woo, haray bantee townon ko'e mon den, ko fii haray kisiyee mon on badike.»

²⁹ Onsay o wadani 6e ngal misal doo, o wi'i 6e: «Ndaaree kii yibbehi maa ledde goo. ³⁰ No de wilitiri, on andanay hoore mon wonde setto ngon badike. ³¹ Ko wano non kadi, no yiirudon dii piiji no wada woo, haray andee wonde *laamu Alla ngun badike. ³² Ka haqiqqa mi andinii on, dun fow waday ado nguu jamaanu feyfude.

³³ Kammu ngun e leydi ndin feyfay, kono min kongudi an din feyfataa.

³⁴ «Reenee hoore mon fii wota berde mon den heewu anndeeji aduna maa faale jaamugol yara haa betoo, haa nde ndee nalaande mawnde juhirta on wa pircol.

³⁵ Ko fii nde hewtay e hoore kala wondo e ndelo oo aduna. ³⁶ Findinee hakkillaaji mon din saa'i woo saa'i, torodon fii no hebiron doole dadugol din piiji wadoyaydi, e fii no daroroyodon yeeso 'Bii-Aaden on.»

³⁷ Tawi e nder nalle den, Iisaa waajotono ka juulirde mawnde, o waaloya jemma e hoore ngoo fello wi'eteengo *Zaytuuni. ³⁸ Jamaa on fow dawrayno ka juulirde mawnde fii hedagol mo kanko Iisaa.

Fii no Iisaa Janforaa

(Mat. 26.1-5; Mrk. 14.1-2; Yhn. 11.45-53)

22¹ Hari *Juldeere Bireedi de Aldaa e Lewen nden badike, nden no wi'ee kadi *Juldeere Yawtaneede.^{d2} Tawi hooreebe *yottinoobe sadaka ben e jannoobe fii Sariya on ben no dabbaynoo feere no be mulira Iisaa, kono tawi hibe huli jamaa on. ³ Onsay Ibiliisa naati e bernde Yudaasi, dun ko oo jammaado Iskariiyu, on ko tawaado e *sahaabaabe Iisaa ben sappoo e dido. ⁴ On yahi yewtidoyi e hooreebe yottinoobe sadaka ben wondude e halfinaabe aynugol *juulirde mawnde nden fii no o wattira Iisaa e juude mabbe. ⁵ Ben weltori dun, be haldi yeenugol mo kaalisi. ⁶ O jabi dun, o woni e dabbugol feere no o wattira Iisaa e juude mabbe, hara jamaa on hoydaali.

^d22.1 Egg. 12

Fii Nafakka Juldeere Yawtaneede nden

(Mat. 26.17-29; Mrk. 14.12-26; Yhn. 13.21-30)

⁷ Bay nalaande Juldeere Bireedi de Aldaa e Lewen nden hewtii, dun ko nalaande hirsanteende baalun nden, ⁸ onsay Iisaa immini Petruusu e Yuuhanna, o wi'i be: «Yahee moyýinanon en nafakka fii ko nafoden ka juldeere.»

⁹ Ben wi'i mo: «Ko honto faaladon yo men moyýinanoy en dun?»

¹⁰ Onsay o wi'i be: «No naatirdon ka saare, on fottay e gorko ronduido loonde ndiyan. On jokkay mo haa e suudu ndu o naati e mun woo. ¹¹ Onsay on wi'ay jom suudu ndun: <Karamoko'en wi'ii men yo men lando on: Ko e suudu hondu be nafodata e taalibaabe mabbe ben nafakka Juldeere Yawtaneede nden?>¹² Ontuma o hollay on konkooru njanndu weyýitaandu ka koore dow. Ko don moyýinton.»

¹³ Be yahi be tawroyi no o haalirannoo be non, be moyýini nafakka juldeere nden.

¹⁴ Bay saa'i on hewtii, Iisaa badii fii nafagol wondude e sahaabaabe be o toddinoo ben sappoo e dido. ¹⁵ Onsay o wi'i be: «Mido faalanoo fota hawtidugol e mon oo nafakka ado mi tampude. ¹⁶ Ko fii mi andinii on, mi jaamitataa oo nafakka ndee juldeere hande kadi haa nde laatoyoo ka *laamateeri Alla.»

¹⁷ Onsay o yetti jardukun wadorkun njaram, o jarni Alla, o wi'i: «Jabee kun jardukun njaram, senditon hakkunde mon. ¹⁸ Ko fii mi andinii on, mi yaritataa hande kadi njaram bibbe wiijnu haa tuma laamateeri Alla ndin ari.»

¹⁹ Bawto dun o yetti kadi bireedi, o jarni Alla, o tayiti, o jonni be, o wi'i: «Dundoo ko bandu an ndu okkadon ndun nii, waddee dundoo maande ko anditiron fii an.»

²⁰ Ko wano non kadi, bay be gaynii jaamude, o yetti jardukun wadorkun njaram, o wi'i: «Kun jardukun ko maande fii *ahadi heyri tippundi e dan yiyan an hibboyteedan fii mon. ²¹ Kono non janfotoodo lan on no jaamidude e an.

²²Bii-Aaden* on no yahude wano muuyiranoo non, kono bone wonanii on janfotoodo mo!»

²³Onsay ɓe woni e landondirgol, wi'a: «Hara ko hombo e men wadoyta dун?»

Fii Yedeteебе Laamu ɓen ka Laamateeri Alla

(Mat. 20.25-28; Mrk. 10.42-45)

²⁴Yeddondiral wadi hakkunde maɓbe fii andugol ko hombo e maɓbe gasata wonude mawdo. ²⁵Onsay Iisaa wi'i ɓe: «Lambe diya leyfí no laamori di doole, ɓen laamiibe no wi'aa wadoobe ko moyfí. ²⁶Kono onon, wota on wa'u wa ɓen. Burdo teddude on e mon, yo wa'u wa suka. Awa kadi lando on, yo wa'u wa kurkaadu.

²⁷Hara ko hombo buri teddude hakkunde wondo nafaade on e wondo ɓannude nafakka on? Hinaa wondo nafaade on? Min-le non, mido woniri hakkunde mon wa on bannoowo. ²⁸Onon-le, ko onon wondunoo e an e nder dii tampereeji an fow. ²⁹Ko dун wadi si mi lamminiray on wano Baaba an lamminirimmi non, ³⁰fii no jaamiroyon yaron ka ndaddudi an, dun ko ka nder laamateeri an, joododon kadi ka julle laamu fii laamoyagol *bolondaaji Isra'iila din sappoo e didi.»

³¹Onsay Iisaa wi'i: «Sim'uunu, Sim'uunu! Ibiliisa torike hendagol on, wesira wa nendi. ³²Kono min mi toranike ma fii wota gomdinal maa ngal hayru. An kadi tuma yiltitidaa e an eto tabintinaa wondibbe maa ɓen.»

³³Onsay Sim'uunu Petruusu jaabii mo, wi'i: «Koohoojo, mido hebulanii yaadugol e maa haa e kaso maa haa e mayde.»

³⁴Onsay Iisaa jaabii mo, wi'i: «Petruusu, mi andinii ma, ndonto yoggataa hande hara a yeddaali wonde hida andimmi haa timma laabi tati.»

³⁵O wi'i ɓe kadi: «Fewndo ko mi neli on e baawo mbuudi e bonfo e pade, on ɻakkiroyano ton goddun?»

Be jaabitii: «Hay huunde.»

³⁶ O wi'i ɓe kadi: «Jooni non ko nii: Kala jogiido mbuudi yo yettu, wano non kadi on mo no mari bonfo yo yettu, awa kadi mo maraa kaafa e mon yo yeeyitu waramba mun on sooda. ³⁷ Awa mi andinii on, bee ko windii fii an kon laatoo, wonde: <O wattidete e wadoobe bone ɓen.>^e Wano non kadi, kala ko windanoo fii an kon ko e laataade woni.»

³⁸ Onsay ɓe wi'i mo: «Koohoojo, e hino doo kaafaaje fidi.»

O wi'i ɓe: «Awa yonii.»

Fii no Iisaa Torori Alla ka wi'etee don Jatsaymaani

(Mat. 26.36-46; Mrk. 14.32-42)

³⁹ Ontuma o yalti o yahi ka Fello *Zaytuuni wano o woowiri non. Taalibaabe makko ɓen kadi jokki mo. ⁴⁰ Bay ɓe hewtii e nden nokkuure, o wi'i ɓe: «Toree Alla fii wota on naatu e jarrabi.»⁴¹ Onsay o wodditori ɓe y eru bugannde hayre, o jicci o torii, ⁴² o wi'i: «Baaba an, si hisa faalaa, yo kun jardukun tampere pottito lan. Kono non wota faale an on wadu, kono yo faale maa on wadu.»⁴³ Onsay malaa'ikaajo iwri ka kammu, ari e makko no tiidina mo. ⁴⁴ Bay sonjaa wonkii hebii mo, o burti toragol. Onsay lakkere makko nden wa'i wa cinte yiyan de no sinte e leydi.

⁴⁵ Bay o gaynii toragol, o immii o yahi ka taalibaabe makko ɓen woni ton, o tawi hibe daanii sabu annde nde ɓe wondi nden. ⁴⁶ Onsay o wi'i ɓe: «Ko fii hondun daanantodon? Immee torodon fii wota on naatu e jarrabi.»

Fii no Iisaa Nangiraa

(Mat. 26.47-56; Mrk. 14.43-50; Yhn. 18.3-12)

⁴⁷ E nder ko o yewtata kon, hawrondiri jamaa yimbe hewtii. Tawi ko oo wi'eteedo Yudaasi tawdaado e sappoo e didoobe ɓen ardii ɓen. On badii Iisaa fii

^e22.37 Isa. 53.12

lunnagol mo.⁴⁸ Onsay Iisaa wi'i mo: «Yudaasi, hara ko lunnagol janfortaa Bii-Aaden on?»

⁴⁹ Bay wondibbe Iisaa ben sogitike ko saatii wadude kon, onsay be wi'i: «Koohoojo, hara yo men huutor kaafaaje amen den?»⁵⁰ Tun goddo e mabbe soppi kurkaadu yottinoowo mawdo sadaka on, o itti mo nowru jaamuru ndun.

⁵¹ Kono Iisaa yetti haala kan, wi'i: «Hattinee doo!» Onsay o meemi nowru on ndun, ndu wattii.

⁵² Iisaa wi'i ben arbe hendagol mo kadi, dun ko hooreebe yottinoobe sadaka ben e hooreebe aynoobe juulirde mawnde nden e mawbe ben: «Hidon ardi e kaafaaje e bedi wa si ko ngujjo arandon.⁵³ Hara-le jnande woo mido wondi e mon ka juulirde mawnde, kono on fawaali juude e an. Kono doo ko saa'i mon nii, e saa'i mbawdi nibe den.»

Fii no Petruusu Yeddiri fii Iisaa

(Mat. 26.69-75; Mrk. 14.66-72; Yhn. 18.15-18, 25-27)

⁵⁴ Bay wonii be nangii Iisaa, be nabi mo ka galle yottinoowo mawdo sadaka on. Petruusu iwtiri baawo mabbe ka wodditii.⁵⁵ Onsay be hubbi yiite ka hakkunde tande, be joodii. Petruusu kadi ari joododi e mabbe.⁵⁶ No debbo kurkaadujo goo yiirunoo mo kanko Petruusu himo joodii ka binde yiite, kanko debbo on o tenyini mo, o wi'i: «Oo doo ko wondiddo Iisaa!»

⁵⁷ Kono kanko Petruusu o yeddi, o wi'i: «Hey ko an yo debbo, min mi andaa oo.»

⁵⁸ Bay nettii seeda, goddo goo kadi yi'i mo, wi'i: «An ko a tawdaado e mabbe.»

Petruusu wi'i ondon kadi: «Mi tawdaaka e mabbe!»

⁵⁹ Bay wonii embere saa'i gooto feyyii, goddo goo kadi catii, wi'i: «Pellet, oo ko wondiddo makko nii, ko fii oo ko mo Jaliilu.»

⁶⁰ Petruusu jaabii ondon kadi, wi'i: «An mi andaa ko hondun wondaa wowlude!» Wa fewndo o wowlata dun, ndontoori ndin yoggi.⁶¹ Onsay Koohoojo on yeeyitii,

cikki gite mun den e Petruusu. Tun Petruusu anditi fii ko Koohoojo on wowlannoo mo kon wondema: «Ado ndonto yoggude hande, haray a yeddii fii an haa timmii laabi tati!»⁶² Onsay Petruusu yalti ka yaasi, o wulli wullaandu sattundu.

⁶³ Tawi yimbe joginoobe Iisaa ben no jalaynood luuboo, ⁶⁴ awa kadi be buumayno mo yeeso ngon, be wi'a: «Hotto ko hombo luubi-maal!»⁶⁵ E hoore dun be kongayno mo, be hoyna.

Fii no Iisaa Nabiraa Yeeso Mawbe Jamaa on

(Mat. 26.59-68; Mrk. 14.55-64; Yhn. 18.19-24)

⁶⁶ Bay weetii, mawbe jamaa on, dun ko hooreebe yottinoobe sadaka ben e jannoobe fii Sariya on ben, mottondiri. Be addi Iisaa ka yeeso dental mabbe, ⁶⁷ be wi'i mo: «Si tawii ko an woni *Almasiihu on, wowlan men.»

Iisaa jaabii be, wi'i: «Si mi haalanii on, on hoolotaako, ⁶⁸ awa kadi si mi landike on, on jaabotaako lan. ⁶⁹ Kono gila jooni Bii-Aaden on joodoto ka sengo naamo Allaahu on, on Jom Bawgal.»

⁷⁰ Be fow be wi'i: «Kere ko an woni *Biddo Alla on?»

Ontuma o wi'i be: «Ko ko wowludon kon onon tigi, ko mi dun.»

⁷¹ Onsay be wi'i: «Ko seedee hombo faaladen kadi? Kanko tigi o wowlili, en nanii!»

Fii no Iisaa Addiraa Yeeso Lambe Diiwe den

(Mat. 27.1-2, 11-26; Mrk. 15.1-15; Yhn. 18.28-40)

23 ¹ Onsay dental ngal fow immii nabi Iisaa ka Pilaatu. ² Be woni e toonugol mo, wi'a: «Men taw oo no murtinde jamaa men on hada be yobugol lando mawdo Roomu on sagalle. Awa kadi himo wi'itii *Almasiihu, dun ko lando.»

³ Pilaatu landii mo, wi'i: «Hara ko an woni lando Yahuudiyanke'en?»

Iisaa jaabii mo, wi'i: «Ko wano wi'irdaa non.»

⁴ Onsay Pilaatu wi'i hooreebe *yottinoobe sadaka ben e jamaa on: «Mi yi'aali hujja woo ko oo neddo jogoree!»

⁵ Kono ɓe catii e dun, ɓe wi'i: «Himo lowirde jamaa on jannugol ɓe. O fuddii gila ka diwal Jaliilu, o rewi e diwal Yahuuda ngal fow haa o hewtii doo jooni.»

⁶ Bay Pilaatu nanii dun, o landii si oo neddo ko mo Jaliilu. ⁷ Bay kanko Pilaatu o andii wonde Iisaa ko e laamateeri *Heroodu ndin jeyaa, o feyini mo ka Heroodu. Tawi e den balde don, on no Yerusalaam.

⁸ Bay Heroodu yi'ii Iisaa, dun weltini mo fota. Tawi gila neebi himo faalanoo mo yi'ude sabu ko o nanaynood no wowlee fii makko kon. Awa kadi himo faalanoo yi'ude himo wada kaawakeeji moyyi goo. ⁹ O landii mo haa juuti, kono Iisaa jaabaaki mo fus.

¹⁰ Tawi hooreebe yottinoobe sadaka ben wondude e jannoobe fii Sariya on ben no don, ben no toona mo toope sattude. ¹¹ Heroodu e suufaabe mun ben kadi jali mo aybini. Onsay o borni mo dolokke fotudo, o nattani mo Pilaatu. ¹² Nden nande tigi Pilaatu e Heroodu ben ayrunoobe welditi.

¹³ Ontuma Pilaatu nodditi hooreebe yottinoobe sadaka ben e yeesoobe ben wondude e jamaa on, ¹⁴ o wi'i ɓe: «On addanii lan oo neddo, on wi'ii ko kanko woni murtinde jamaa on. E hino mi landike mo e tawnde mon, mi yi'aali dalil woo e hoore oo neddo ko toojiron mo. ¹⁵ Awa Heroodu kadi-le wano non, ko fii o artiranii en mo. Awa-le oo neddo wadaa hay huunde ko foddi e wareede. ¹⁶ Jooni mi donkinay mo, mi accita.»

¹⁷ Tawi no farlii mo kanko Pilaatu, juldeere bee accitangol ɓe nangaado goo.

¹⁸ Onsay ɓe fow ɓe sonki, ɓe wi'i: «Waree oo doo! Accitanon men Barabaasi!» (

¹⁹ Tawi on-le ko sokiraa, ko sabu gere no wadunoo ka saare e waru hoore.)

²⁰ Pilaatu yewti ɓe fahin, bay hari no e fondo makko accitugol Iisaa. ²¹ Kono hibe sonkaynood, wi'a: «Fempee mo! Fempee mo!»

²²Pilaatu wi'i ɓe tammun: «Hara ko hondun oo bonni? Min mi yi'aali dalil woo ko oo wariree. Jooni mi donkinay mo, mi accita.»

²³Kono ɓe catii e dun e hoore sonko njano, hibe toroo yo o fempe. Ngon sonko maɓbe fooli mo kanko Pilaatu. ²⁴Pilaatu jabani ɓe faale maɓbe on. ²⁵O acciti on mo ɓe torii mo fii mun, dun ko oo sokiranoodo fii gere e waru hoore, o wadi Iisaa faale maɓbe on.

Fii no Iisaa Wariraa

(Mat. 27.32-44; Mrk. 15.21-32; Yhn. 19.17-27)

²⁶Fewndo ɓe nabaynoo Iisaa fii warugol mo, ɓe hendii goddo mo Sirenii iwaynoodo ngesa, on no wi'ee Sim'uunu. Be rondi mo *leggal altindiraangal ngal, o iwtiri baawo Iisaa. ²⁷Tawi jamaa moolanaado no iwtiri baawo makko wondude e rewbe, ɓen no wulla fesa fii makko kanko Iisaa. ²⁸Onsay Iisaa fewtiti ɓe, wi'i: «Ko onon yo rewbe Yerusalaam, wota on wullu fii an, kono wullee fii mon e fii bibbe mon ɓen. ²⁹Ko fii jalaade no aroya ka wi'oytee: ‹Maloore wonanii ɓen ɓe jiidotaako e ɓen ɓe hebaali bibbe e ɓen ɓe muyninaali!›³⁰Onsay yimbe ɓen wi'oyay: ‹Pelle yanee e hoore amen! Cehe suumee men!›³¹Hara si ledde kecce den warraama nii, haray ko honno yorde den warroytee?»

³²Tawi bonbe dido no nabideede e Iisaa fii waridoyegol e makko. ³³Bay ɓe hewtii e ndee nokkuure wi'eteende Laalagal Hoore, ɓe fempi mo don wondude e ɓen bonbe dido, goddo on ka sengo makko jaamo, oya on ka nano makko. ³⁴Onsay Iisaa wi'i: «Baaba an, yaafu ɓee, ko fii ɓe andaa koo ko ɓe woni wadude.» Onsay ɓen suufaabé sendiri conci makko din urba^f.

³⁵Tawi yimbe ɓen no darii don no ndaara. Yeesoobé ɓen kajun no awmotonoo mo, wi'a: «O dandii beya, awa yo o dandu hoore makko kadi si tawii ko kanko woni Almasiihu Alla, Subaado on!»

^f23.34 Zab. 22.19

³⁶ Suufaaabé ben kajun kadi no jalaynoo mo, bée badii bannangol mo ndiyan lammudan, ³⁷ hibe wi'a: «Si tawii ko an woni Lando Yahuudiyanke'en, dandito an tigi!»

³⁸ Tawi no windii dow makko wonde: «Oo doo ko Lando Yahuudiyanke'en nii.»

³⁹ Tawi bondo mo o fempidaa wengaa goo no hoynaynoo mo, wi'a: «Wonaa an woni Almasiihu on? Awa dandu goy hoore maa, dandaa men menen kadi!»

⁴⁰ Kono dimmo makko on feli mo, wi'i: «An a hulataa Alla? An oo yagginiraado wa makko, ⁴¹ enen dido-le hidé foddi e dun, ko fii ko kuude men hettuden. Kono oo doo wadaali hay fus ko boni.»

⁴² Onsay o wi'iti kadi: «Iisaa, anditoyee fii an tuma artoydon ka laamu mon.»

⁴³ Iisaa jaabii mo, wi'i: «Mi holnii ma wondema hande tigi a wonday e an ka aljanna.»

Fii Mayde Iisaa nden

(Mat. 27.45-56; Mrk. 15.33-41; Yhn. 19.25-30)

⁴⁴ Bay wonii naange e hoore, niwre wadi e leydi ndin fow haa ka baawo fanaa.

⁴⁵ Naange ngen weni, *wirngallo hormorde nden ka *juulirde mawnde feeri e hakkunde. ⁴⁶ Iisaa ewnii ko tiidi, o wi'i: «Baaba an, mi wattii ruuhu an on e juude maa.» No o gaynirnoo wi'ude dun, o timmi.

⁴⁷ Bay hooreejo suufaabében yi'ii kon ko wadi don, o mawnini Alla, o wi'i: «Ka haqiiqa, hari oo neddo ko feewudo.»

⁴⁸ Bay jamaa arnoobe yi'ugol ko wadaynoo don kon yi'ii dun, bée yiltitii hibe tappitoo e berde. ⁴⁹ Tawi kala andunoobe mo kanko Iisaa, wondude e rewbe iwtirnoobe baawo makko ben gila Jaliilu, no darii ka wodditii, no ndaara kon ko woni wadude.

Fii no Iisaa Surriaa

(Mat. 27.57-61; Mrk. 15.42-47; Yhn. 19.38-42)

⁵⁰Tawi neddo moyyo feewudo wi'eteedo Yuusufu no tawanoo e ngal dental mawbe *Banii-Isra'iila'en ben, ⁵¹on kajun jabaano taweede e fewjoore mabbe nden e den kuude mabbe. Hari on ko jeyaado e ndee saare Yahuudiyankeebé wi'eteende Raamati, tawi on ko *laamu Alla ngun tijjii. ⁵²On yahi ka Pilaatu, o torii mo hettugol furee Iisaa on. ⁵³Bawto dun, o yahi, o tippini furee Iisaa on ka hoore leggal, o tumbi e kasannge, o belnoyi mo e qaburu asaado e feto, mo hari hay gooto surraaka e mun. ⁵⁴Dun hawri jande hebulanagol *jalaande fowteteende nden, bay hari nden badike ka naata. ⁵⁵Rewbe ardunoobe e Iisaa ben gila Jaliilu jokki Yuusufu, be yi'oyi yenaande nden e no furee on belniraa. ⁵⁶Onsay rewbe ben yiltitii fii moyyinoygol tiiri e angiri. No asewe on naatirnoo, be fowtii wano Sariya on wi'iri non.

Fii Wurniteede Iisaa Almasiihu on

(Mat. 28.1-10; Mrk. 16.1-8; Yhn. 20.1-10)

24 ¹E alat, dun ko jallal aranal e nder yontere nden, ben rewbe dawi bimbi subaka ka yenaande, hibe yoobii tiiri ndi be moyyinnoo. ²Be tawi hayre ombiranoonde yenaande nden tallaama, ³be naati, kono be tawaali ton furee Iisaa Koohoojo on. ⁴Wa fewndo ko be mijotoo fii dun, worbe dido borniibe conci jalbusi, feejani be. ⁵Be fow be huli, be ugginii ka leydi. Kono ben worbe dido wi'i be: «Ko fii hondun dabbitanton wurdo on e hakkunde maybe ben? ⁶O alaa doo, o immintinaama. Anditee ko o wowlanaynood on kon fewndo o wonnood Jaliilu, ⁷himo wi'aynood on: «Bee *Bii-Aaden on wattee e juude junuubanke'en, o fempee, o waree, o immintinoyee ka jalaande tammere.»»⁸Tun, ben anditi din kongudi Iisaa Almasiihu on.

⁹ Onsay ɓe iwi ka yenaande don, ɓe yahi yeetoyagol dун *sahaabaabe ɓen sappoo e go'o wondude e heddiibe ɓen fow. ¹⁰ Ben rewbe ko Mariyama Magaduuna e Yuuwanna e Mariyama yumma Yaaquuba wondude e wobbe goo, wowlanoynoo dun sahaabaabe ɓen sappoo e go'o. ¹¹ Kono ɓe ronki hoolaade ɓen rewbe, tawi kongudi ɓen din no wa'ani ɓe wa fuyanteeji. ¹² Kono Petruusu immii dogiri ton. Bay o hewtii, o ugginii ka yenaande, ko kasannge on tun o yi'i ton. Onsay o hooti ka makko e hoore himo ɿaldì sabu kon ko wadi.

Fii Taalibaabe ɓen Dido ka Laawol Emayuusu

(*Mrk. 16.12-13*)

¹³ Tawi nden jnande tigi dido e mabbe no yahaynoo e hodo no wi'ee Emayuusu wodditorng Yerusalaam embere kilomeeterji sappoo e didi. ¹⁴ Tawi ɓen no yewta fii ko wadunoo kon fow. ¹⁵ Wa fewndo ko ɓe yewtata dun ɓe landondira, Iisaa badii ɓe, o waddi e mabbe laawol. ¹⁶ Kono tawi giide mabbe den no wirnanaa anditugol mo.

¹⁷ Onsay o wi'i be: «Ko kongudi hondi wondon bugondirde e nder nduu yaadu mon?»

Be dartii, ɓe yoomi. ¹⁸ Onsay goddo e mabbe wi'eteedo Keleyopaasu jaabii mo, wi'i: «Haray ko an tun woni kodo wondo Yerusalaam mo andaali ko wadi kon e dee balde doo?»

¹⁹ Onsay o wi'i be: «Hondun?»

Be wi'i mo: «Koo ko wadi e hoore Iisaa oo jeyaado Naasirata, dun ko oo annabaajo jom kuugal e kongol yeeso Alla e yeeso jamaa on fow, ²⁰ e ko honno kadi hooreebe *yottinoobe sadaka men ɓen e hooreebe men ɓen wattiri mo e juude beya fii yo ɓen jaawu mo, ɓe fempa mo e leggal, ɓe wara. ²¹ Meden tanyininoo ko kanko yaltinayno *Banii-Isra'iila'en e njaggu. Kono e nder dun fow, e hino hebii hande balde tati gila dun wadi. ²² Awa kadi rewbe wondibbe amen

goo ɿaldinii men fota, nde ɓe dawunoo ka yenaande,²³ ɓe tawaali ton furee makko on. Be ari ɓe wi'i men malaa'ikaabe feejanii ɓe, ben wi'ii ɓe wonde kanko Iisaa himo wuuri.²⁴ Onsay wondibbe amen goo kadi yahi ka yenaande, be tawaali furee Iisaa on ton, tawi ko no rewɓe ɓen wiirunoo men non tigi woniri!»

²⁵ Onsay kanko Iisaa o wi'i ɓe: «Ko onon yo njofoobe, hidon nennanii gomdingol kala ko annabaabe ɓen *hiitino kon!²⁶ Hara haananaa *Almasiihu on ka o tampira nii ado o naatude ka mangural makko?»²⁷ Onsay o nangi sifanagol ɓe ko windii fii makko kon fow ka defte, gila e Muusaa e beya annabaabe fow.

²⁸ Bay wonii ɓe badike hodo ngo ɓe yahaynoo e mun ngon, o faaminani ɓe wonde ko toonin ton o sutii.²⁹ Kono be jeeji mo, be wi'i: «Wonen, ko fii naange ngen yoroyii, niɓbay woni.» Onsay o naatidi e maɓbe.

³⁰ Fewndo o joododi e maɓbe fii jaamugol, o yetti bireedi on, o du'ii, o tayiti, o jonni ɓe.³¹ Tun, giide maɓbe den udditii, be anditi mo, onsay o majjitori ɓe.³² Be woni e wi'indirgol: «Hinaa berde men den no amaynoo weltaare fewndo ko o yewtata en ka laawol, o sifanoo en ko windii kon ka defte?»

³³ Be immii kisan, ɓe yiltitii Yerusalaam, be ari ɓe tawi sahaabaabe ɓen sappoo e go'o e wondibbe mun ɓen no mottondiri don.³⁴ Tawi ɓen wonnoobe don no wi'a: «Ka haqiiqa, Koohoojo on immintinaama, o feejanii Sim'uunu!»^{g35} Onsay beya dido kadi sifanii ɓe ko ɓe yi'i kon ka laawol e ko honno ɓe anditiri mo ka sendo bireedi.

Fii no Iisaa Feepirani Sahaabaabe ɓen

(Mat. 28.16-20; Mrk. 16.14-18; Yhn. 20.19-23)

³⁶ Wa fewndo ko ɓe yewtaynoo dун, kanko tigi o ari hakkunde maɓbe, o wi'i ɓe:
«Yo jam wonu e mon!»

^g24.34 Ko Sim'uunu oo doo woni jammaado Petruusu.

³⁷Tun ɓe denyii, ɓe huli, ɓe sikki ko mbeelu ɓe yi'i. ³⁸Kono o wi'i ɓe: «Ko hondun jibidon? Ko fii hondun kadi ndee sikkitaare wonani ka berde mon? ³⁹Ndaaree dee juude an e dee koyde an. Ko min tigi nii! Meemee lan, ndaaron, ko fii mbeelu alaa teewu, alaa yi'e, on yi'ii-le min mido mari.»

⁴⁰Bay wonii o wi'iidun, onsay o holli ɓe juude makko den e koyde makko den.

⁴¹Bay tawii e nder weltaare mabbe nden haa jooni ɓe hoolaaki, hibe e nder ŋalaw, onsay o wi'i ɓe: «Hara hidon mari doo godsun ko jaametee?»⁴² Onsay ɓe bannani mo hunttere lingii sa'aangii. ⁴³O yetti ngii, o nafii yeeso mabbe.

⁴⁴Onsay o wi'i ɓe: «Ko dundoo mi wowlannoo on fewndo mi wondunoo e mon, wonde bee ko windii fii an kon fow ka Sariya Muusaa e ka Zabuura e ka defte ɓeyaa annabaabe laatoo.»

⁴⁵Ontuma o udditani ɓe hakkille mabbe den fii no ɓe faamira defte den. ⁴⁶O wi'i ɓe kadi: «Ko dundoo windii wondema Almasiihu on tampay, o immintinee e hakkunde maybe ben ka jallal tammal. ⁴⁷Awa kadi leyyi din fow waajete e innde makko gila Yerusalaam fii yo ɓe tuubu, ɓe yaafanee junuubaaji mabbe din. ⁴⁸Ko onon woni seedeebe dun ben. ⁴⁹Jooni non mi addanoyay on ko Baaba an fodunoo kon. Kono onon luttee ka nder saare, haa tuma yedadon bawgal iwrayngal ka dow ngal.»

Fii Ƴentineede Iisaa Almasiihu on

(Mrk. 16.19-20; Sah. 1.9-11)

⁵⁰Bawto dun Iisaa nawriɓe telen *Betanii, o fonti juude makko den, o du'anii ɓe.

⁵¹Wa fewndo ko o du'antoo ɓe, o acci ɓe don, o Ƴentinaa ka kammu. ⁵²Bay kambe ɓe sujjanii mo, ɓe yiltitii Yerusalaam e hoore welo-welo mawngo. ⁵³Onsay ɓe tabiti ka *juulirde mawnde, hibe mawnina Alla.

ÉVANGILE SELON LUC
en Langue Pular (Fouta-Jalon)
République de Guinée
© 2013 Traducteurs Pionniers de la Bible
en collaboration avec
Mission Protestante Réformée